

MESYUARAT KETIGA, PENGGAL KELIMA
PARLIMEN KEEMPAT BELAS
2022

HARI KHAMIS : 6 OKTOBER 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9 HINGGA NO. 43)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN
DEWAN RAKYAT, MESYUARAT KETIGA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 6 OKTOBER 2022 (KHAMIS)

SOALAN:

DATIN PADUKA DR. TAN YEE KEW [WANGSA MAJU] minta **MENTERI KOMUNIKASI DAN MULTIMEDIA** menyatakan kesediaan untuk Kementerian membenarkan siaran politik secara sekata kepada semua parti politik melalui televisyen dan radio menjelang Pilihan Raya Umum ke-15 (PRU15).

JAWAPAN:

Tuan Yang di-Pertua,

Kementerian Komunikasi dan Multimedia Malaysia melalui agensi penerangan dan penyiaran bersedia mempertimbangkan ruang dan peluang kepada parti-parti politik untuk bersiaran di platform rasmi kementerian menjelang Pilihan Raya Umum ke-15.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJI SHABUDIN BIN YAHAYA
(TASEK GELUGOR)**

TARIKH : 06 OKTOBER 2022 (KHAMIS)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI KANAN KERJA RAYA** menyatakan langkah yang diambil bagi mengatasi kesesakan di Lebuhraya Utara Selatan di sepanjang laluan dari Juru ke arah Sungai Dua dan sebaliknya. Adakah Kerajaan merancang untuk membina laluan terus (by pass) di kawasan itu bagi mengatasi masalah terutama pada waktu puncak.

JAWAPAN

Tuan Yang Di-Pertua,

Untuk makluman Ahli Yang Berhormat, bagi tindakan jangka pendek, Lembaga Lebuhraya Malaysia (LLM) dan Syarikat Konsesi lebuhraya dengan kerjasama Polis Diraja Malaysia (PDRM) sedang menjalankan sesi percubaan untuk menggunakan bahu jalan sedia ada dari Bukit Tambun ke Juru (Arah Utara) sebagai lorong tambahan (*smart lane*) pada waktu tertentu seperti musim perayaan untuk meningkatkan kapasiti laluan berkenaan dan melancarkan pergerakan trafik. Selain itu, pengguna lebuhraya yang menuju ke Perai / Butterworth mempunyai pilihan untuk menggunakan Lebuhraya Lingkaran Luar Butterworth (LLB) bagi mengelakkan kesesakan di jajaran lebuhraya antara Sungai Dua ke Perai.

Perancangan jangka masa panjang bagi mengurangkan kesesakan yang berlaku di Lebuhraya Utara Selatan (PLUS) bagi laluan dari Juru ke Sungai Dua adalah dengan melaksanakan Kajian Kemungkinan Lebuhraya Koridor Utara (*Northern Corridor Highway* – NCH). Kajian berkenaan telah dilaksanakan untuk mengenalpasti jajaran yang paling sesuai.

Cadangan Jajaran NCH tersebut adalah bermula dari Changkat Jering (sambungan Lebuhraya Pantai Barat - WCE) hingga ke Padang Besar, Perlis melalui Taiping, Selama, Kuala Ketil, Sungai Petani, Gurun, Pendang, Pokok Sena, Jitra dan berakhir di Padang Besar, Perlis. Cadangan Lebuhraya NCH akan menyediakan *by pass* dari Juru ke Sungai Dua untuk trafik dari selatan menuju ke Kedah dan Perlis tanpa melalui laluan Juru ke Sungai Dua di Lebuhraya PLUS. Oleh itu, ianya dijangka akan dapat mengurangkan kesesakan terutamanya pada cuti perayaan dan juga cuti persekolahan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI PANGLIMA MADIUS
TANGAU [TUARAN]**

TARIKH : 6 OKTOBER 2022 (KHAMIS)

SOALAN

DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan adakah Kerajaan bercadang untuk menjadikan Unit Sabah dan Sarawak di Jabatan Perdana Menteri sebagai sebuah Kementerian penuh.

JAWAPAN

Tuan Yang di-Pertua,

Untuk makluman Ahli Yang Berhormat, cadangan menjadikan Unit Sabah dan Sarawak di Jabatan Perdana Menteri sebagai sebuah Kementerian penuh masih dalam penelitian dan kajian pihak Kerajaan dan belum dibincangkan oleh pihak Majlis Khas MA63.

Pada masa kini, Bahagian Hal Ehwal Sabah dan Sarawak (BHESS) berfungsi sepenuhnya dan dapat menunaikan Visi, Misi dan Matlamat-Matlamat yang digariskan untuk Bahagian ini sesuai dengan tuntutan dan aspirasi memelihara hak-hak dan kepentingan yang termaktub di dalam Perjanjian Malaysia 1963.

Penempatan BHESS di dalam Jabatan Perdana Menteri juga adalah tepat kepada keperluannya diletakkan di mana sumber kepakaran teknikal berpusat seperti perundangan, penyelidikan dan perancangan ekonomi (*economic research and planning*) dan hal keselamatan seperti mana diperlukan demi menyelaraskan tuntutan-tuntutan yang

NO. SOALAN : 12

dikemukakan oleh pihak negeri Sabah dan Sarawak sebagai penandatanganan (*signatory*) kepada Perjanjian Malaysia 1963. Pihak kerajaan pusat akan meneliti kedudukan dan penempatan BHESS dari masa ke semasa sesuai dengan tugas kerja dan program-program strategik serta agenda tugas yang diamanahkan oleh pihak Kerajaan Pusat dan Majlis Khas MA63.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK ZAKARIA BIN MOHD. EDRIS @ TUBAU
[LIBARAN]**

TARIKH : 6 OKTOBER 2022 (KHAMIS)

SOALAN

DATUK ZAKARIA BIN MOHD. EDRIS @ TUBAU [LIBARAN] minta **PERDANA MENTERI** menyatakan apakah usaha Kerajaan dalam memastikan Sabah mendapat manfaat daripada pembangunan berikutan perpindahan ibu kota negara Indonesia dari Jakarta ke Kalimantan Timur.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pembangunan kawasan sempadan di Sabah dan Sarawak adalah antara perkara yang diberi tumpuan dalam Bab 7 RMKe-12, iaitu Memperkukuh Pembangunan Sosioekonomi di Sabah dan Sarawak.
2. Beberapa inisiatif yang dikenalpasti adalah seperti Ketersambungan Infrastruktur untuk Menggalakkan Hubungan Ekonomi yang Lebih Kukuh dengan Kalimantan dan Mempertingkatkan Keselamatan Sempadan dan Maritim.

3. Bagi memastikan usaha Kerajaan adalah bersepadu dan holistik, Kerajaan telah menubuhkan Pasukan Petugas Khas (*Taskforce*) Mengenai Pembangunan Di Kawasan Sempadan Malaysia dan Indonesia (Sabah-Sarawak-Kalimantan) di bawah Jawatankuasa Kerja Sosio-Ekonomi (JKSE), Majlis Khas Mengenai Perjanjian Malaysia 1963 (MKMA63).

4. *Taskforce* ini bertujuan untuk meneliti perkara-perkara berkaitan pembangunan di kawasan sempadan tersebut. Antara fokus utama *Taskforce* ini adalah merancang dan menyelaraskan penyediaan Pelan Tindakan Pembangunan di Sempadan Malaysia dan Indonesia (Sabah-Sarawak-Kalimantan) dan memantau pelaksanaannya.

5. Bagi merancakkan lagi ekonomi kedua-dua negara, khususnya negeri Sabah dan Sarawak yang bersempadan dengan Kalimantan, Indonesia satu lawatan kerja ke Indonesia telah diadakan oleh YB Menteri di Jabatan Perdana Menteri (Ekonomi) dan YB Menteri di Jabatan Perdana Menteri (Hal Ehwal Sabah dan Sarawak) pada 26 Mac – 1 April 2022. Antara peluang ekonomi dan pelaburan yang boleh diterokai termasuklah dari segi pembangunan dan pelaburan infrastruktur, pengembangan perdagangan serta penyediaan perkhidmatan dan pengetahuan teknikal.

6. Di bawah *Rolling Plan* 2 Tahun 2022, Kerajaan telah meluluskan beberapa projek bagi pembangunan kawasan sempadan Sabah. Antaranya adalah:

- (i) Kajian Pembangunan Ekonomi Di Sempadan Sabah oleh pihak *Sabah Economic Development and Investment Authority* (SEDIA);
- (ii) Projek pembinaan pos kawalan di Poirgon;
- (iii) Projek pembinaan pos kawalan di Manalunan; dan
- (iv) Projek pembinaan pos kawalan di Kuala Meruap.

7. Aspek keselamatan merupakan antara faktor utama dalam menjamin aktiviti pelaburan di negeri Sabah. Kerajaan akan terus memberikan penekanan terhadap keselamatan sempadan dengan meningkatkan keupayaan dan kemampuan pertahanan serta meningkatkan keberadaan bagi melindungi kepentingan sosioekonomi dan keselamatan. Antara projek yang sedang dilaksanakan bagi meningkatkan keselamatan di Sabah adalah seperti:

- (i) Pembangunan Kem Tentera Darat di Felda Sahabat, Lahad Datu;
- (ii) Pembinaan Kompleks Pentadbiran Batalion 20 Pasukan Gerakan Am (PGA) di Beluran; dan
- (iii) Pembinaan Pangkalan Maritim Agensi Penguatkuasaan Maritim Malaysia di Semporna.

8. Untuk makluman Ahli Yang Berhormat, Kerajaan Malaysia dan Kerajaan Indonesia sentiasa membincangkan perkara melibatkan kerjasama dua hala dan pelbagai hala berkenaan pembangunan wilayah sempadan negara dalam pelbagai platform, antaranya termasuklah Kawasan Pertumbuhan ASEAN Timur Brunei Darussalam-Indonesia-Malaysia-Filipina (BIMP-EAGA). Di dalam platform BIMP-EAGA ini, pelbagai perkara dibincangkan khususnya untuk meningkatkan kesalinghubungan (*connectivity*) antara wilayah dan juga mengurangkan jurang kemiskinan antara penduduk wilayah BIMP-EAGA.

9. Kerajaan yakin bahawa usaha-usaha yang dilaksanakan bagi pembangunan kawasan sempadan di Sabah ini akan menyumbang kepada peningkatan sosioekonomi dan kesejahteraan penduduk di negeri Sabah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : CHARLES ANTHONY SANTIAGO
[KLANG]**

TARIKH : 6 OKTOBER 2022 (KHAMIS)

SOALAN :

Minta **PERDANA MENTERI** menyatakan penjelasan mengenai kenyataan dari Majlis Keselamatan Negara (MKN) mencadangkan bahawa pejabat UNHCR ditutup dan tanggungjawab mengurus pelarian diambil alih oleh Kerajaan. Apakah langkah – langkah yang akan diambil untuk memastikan pengambil alih ini dilaksanakan selaras dengan undang – undang antarabangsa sambil memastikan hak asasi manusia pelarian dihormati.

JAWAPAN

**DI JAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Dipertua,

1. Dalam usaha untuk menguruskan isu-isu pelarian dan pemohon suaka di Malaysia dengan lebih baik dan efisien, Kerajaan kini sedang melaksanakan pembaharuan berstruktur (*structural reform*) terhadap polisi dan dasar sedia ada. Pada ketika ini, Majlis Keselamatan Negara, Jabatan Perdana Menteri adalah agensi yang bertanggungjawab untuk menyelaraskan dan mengkoordinasi Kementerian dan Agensi Kerajaan berhubung pengurusan pelarian dan pemohon suaka melalui Arahan Majlis Keselamatan Negara (MKN) No. 23 : Mekanisme Pengurusan PATI yang memegang Kad UNHCR tahun 2019. Arahan MKN No. 23 ini sedang di dalam proses penambahbaikan dan penekanan telah diberikan terhadap pengukuhan kepada proses penentuan status pelarian yang akan dilaksanakan oleh Kerajaan, penubuhan jawatankuasa khusus di peringkat tertinggi pentadbiran Kerajaan serta penyelarasan sistem sokongan sosial kepada pelarian dan pemohon suaka. Dalam hal ini, pejabat UNHCR telah berada di Kuala Lumpur bagi menguruskan penempatan ke negara ketiga atau dihantar pulang ke negara asal. Walaubagaimanapun, didapati kehadiran pelarian khususnya dari Myanmar terus meningkat dan penghantaran pulang ke negara asal atau negara ketiga amat rendah.
2. Kehadiran pejabat UNHCR di Malaysia juga berdasarkan kepada undangan untuk mengurus pelarian Vietnam pada tahun 70'an dan kini semua pelarian Vietnam telah pulang ke negara asal atau ditempatkan ke negara ketiga. Kerajaan tidak berhasrat untuk mengekalkan peranan UNHCR selama-lamanya dalam menguruskan pelarian dan pemohon suaka di Malaysia. Keberadaan pejabat UNHCR di Malaysia dilihat telah menjadi faktor

penarik kepada peningkatan kemasukan migran asing untuk mendapatkan kad UNHCR dan tinggal di negara ini. Sehubungan dengan itu, Kerajaan telah mengambil inisiatif untuk menambahbaik polisi dan perundangan sedia ada negara secara menyeluruh untuk memastikan Kerajaan lebih berperanan dalam isu ini. Namun begitu, transisi ini perlu dilaksanakan dengan berhemah dan ketekunan wajar (*due diligence*) selain memastikan agensi Kerajaan benar-benar bersedia untuk mengambil alih peranan yang dimainkan oleh pihak UNHCR dan dengan demikian tiada lagi keperluan pejabat UNHCR di Malaysia. Pejabat UNHCR di Thailand atau di Indonesia boleh memainkan peranan lain yang diperlukan oleh pihak UNHCR berkaitan pelarian di Malaysia. Kerajaan akan memastikan agar setiap pihak termasuk pihak UNHCR di Malaysia untuk bekerjasama bagi memastikan Malaysia mempunyai dasar dan perundangan yang jelas, selaras dan sistematik berkaitan pengurusan pelarian dan pemohon suaka tanpa perlu mempunyai keterikatan dengan apa-apa instrumen antarabangsa.

Sekian, Terima Kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR BIN
HAJI NASARAH [LENGGONG]**

TARIKH : 6 OKTOBER 2022 (KHAMIS)

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **MENTERI LUAR NEGERI** menyatakan apakah usaha yang dilakukan oleh pihak Kementerian bagi menyelamatkan dan membawa pulang 195 individu yang menjadi mangsa pemerdagangan manusia akibat terpedaya dengan modus operandi tawaran pekerjaan berpendapatan lumayan di luar negara seperti Kemboja, Thailand dan apakah kekangan yang dihadapi di dalam menjayakan usaha ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Lenggong di atas pertanyaan yang dikemukakan.

2. Untuk makluman Dewan yang mulia ini, Kementerian Luar Negeri (KLN) amat prihatin serta memandang serius berhubung isu sindiket penipuan tawaran pekerjaan di luar negara yang membabitkan Keluarga Malaysia. Sebagaimana Dewan yang mulia ini juga sedia maklum, Mesyuarat Jemaah Menteri pada 21 September 2022 telah

mengarahkan supaya satu Jawatankuasa Khas melibatkan agensi-agensi yang berkaitan yang diketuai oleh KLN bagi menangani isu ini secara bersepadu dan menyeluruh. Kementerian sedang mengambil tindakan-tindakan yang sewajarnya berhubung perkara ini.

Tuan Yang di-Pertua,

3. Setakat 22 September 2022, KLN melalui Kedutaan-Kedutaan Besar Malaysia di Bangkok, Phnom Penh, Vientiane dan Yangon telah menerima sejumlah 301 laporan mengenai warganegara Malaysia yang menjadi mangsa sindiket penipuan tawaran pekerjaan di luar negara. Daripada jumlah tersebut, seramai 202 orang telah berjaya diselamatkan, dengan 168 orang telah dihantar pulang. Baki seramai 34 orang yang lain sedang ditahan di depoh tahanan imigresen sementara menunggu proses pengusiran pulang, manakala 99 orang lagi masih sedang dikesan.

4. Negara yang mempunyai bilangan kes paling ramai dilaporkan adalah Kemboja dengan 158 kes. Ini diikuti dengan Myanmar 59 kes, Laos 56 kes dan Thailand 28 kes. Daripada jumlah tersebut, bilangan mangsa yang telah diselamatkan di Kemboja adalah seramai 153 orang, 5 orang di Myanmar, 28 orang di Laos dan 16 orang di Thailand.

5. Antara punca utama warganegara Malaysia tertarik dengan tawaran pekerjaan di luar negara termasuklah dijanjikan gaji yang lumayan dengan kemudahan tempat tinggal serta makan minum yang disediakan, ditawarkan pelbagai faedah termasuk percutian berbayar dan pinjaman wang termasuk bagi tujuan berjudi serta terpengaruh dengan ajakan saudara mara atau rakan-rakan. Selain itu, tidak boleh dinafikan bahawa ada mangsa yang menerima tawaran pekerjaan sedemikian kerana terdesak untuk menyara ahli keluarga.

6. Semua aduan serta dokumen yang diterima oleh KLN daripada pihak waris akan disalurkan terus kepada Perwakilan-Perwakilan Malaysia yang berkenaan untuk tindakan selanjutnya dengan pihak berkuasa negara tuan rumah. Pada masa yang sama, proses ini adalah tertakluk kepada prosedur dan undang-undang di negara terbabit yang

melibatkan urusan seperti siasatan, intipan, usaha menyelamatkan, dokumentasi dan sebagainya yang akan mengambil masa.

7. Perwakilan-Perwakilan Malaysia yang terlibat sedang giat bekerjasama dengan pihak berkuasa negara tuan rumah untuk mengesan dan menyelamatkan semua mangsa yang masih berada dalam kawalan kumpulan sindiket di keempat-empat negara tersebut.

8. Tindakan-tindakan yang diambil oleh Perwakilan Malaysia termasuklah mendapatkan bantuan dan kerjasama daripada pihak kerajaan negara terbabit, mengadakan pertemuan dengan pihak berkuasa yang terlibat untuk mengesan serta menyelamatkan para mangsa serta memberikan bantuan konsular sewajarnya setelah mereka diselamatkan bagi membolehkan mereka pulang ke tanah air.

9. Antara kekangan utama yang dihadapi oleh Perwakilan-Perwakilan kita di luar negara dalam usaha menyelamatkan mangsa termasuklah kesukaran akses ke kawasan yang bergolak atau berisiko tinggi, ketiadaan maklumat lengkap dan tepat serta para mangsa yang dipindahkan oleh pihak sindiket dari semasa ke semasa.

10. Untuk makluman Dewan yang mulia ini, Kementerian melalui pelbagai platform telah menasihati individu atau waris yang menjadi mangsa untuk membuat laporan polis terlebih dahulu bagi membantu siasatan. Bagi mengelakkan diri daripada terjebak dalam sindiket ini, mereka yang menerima tawaran pekerjaan di luar negara adalah digalakkan untuk membuat semakan tawaran tersebut terlebih dahulu dengan Perwakilan Malaysia yang berkenaan sekiranya merasa ragu-ragu tentang tawaran yang diterima.

11. Mereka juga perlu memastikan visa pekerjaan diperolehi terlebih dahulu sebelum melakukan perjalanan ke luar negara untuk bekerja. Perjalanan keluar masuk ke sesebuah negara perlu menggunakan Pasport Malaysia Antarabangsa dengan melalui pintu-pintu sempadan antarabangsa secara sah. Surat tawaran dan kontrak pekerjaan juga perlu difahami dan dimeterai secara bertulis mengikut undang-undang

buruh negara tersebut. Warganegara Malaysia yang bekerja di luar negara dinasihatkan supaya turut cakna dengan undang-undang negara berkenaan.

12. Saya ingin mengingatkan semua pihak supaya jangan mengambil sebarang tindakan secara melulu dan tergesa-gesa termasuk mengeluarkan kenyataan yang tidak tepat, yang boleh membahayakan keselamatan serta menjejaskan operasi menyelamatkan warganegara Malaysia yang berada di tempat-tempat berkenaan. Semua pihak disarankan untuk merujuk kepada KLN atau Perwakilan Malaysia di negara-negara tersebut sebelum mengambil sebarang tindakan.

Tuan Yang di-Pertua,

13. Setakat ini, isu membanteras sindiket penipuan pekerjaan di luar negara belum lagi diperbincangkan di peringkat Menteri Luar negara-negara ASEAN, memandangkan ianya bersifat dua hala. Namun, Kerajaan akan terus pro-aktif dalam mengetengahkan isu ini semasa pertemuan dan perbincangan dua hala dengan negara-negara yang terlibat di sela-sela Mesyuarat ASEAN bagi mencari penyelesaian terbaik dalam isu ini bagi memastikan keselamatan dan kesejahteraan Keluarga Malaysia di luar negara sentiasa terpelihara. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 6 OKTOBER 2022 (KHAMIS)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **PERDANA MENTERI** menyatakan apakah dapatan bagi rundingan berhubung pemberian geran khas mengikut Perkara 112D Perlembagaan Persekutuan antara Kerajaan Sarawak dengan Kerajaan Persekutuan melalui Majlis Khas mengenai Perjanjian Malaysia 1963.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat Jawatankuasa Kerja Kajian Semula Pemberian Khas Kepada Negeri Sarawak Di Bawah Perkara 112D Perlembagaan Persekutuan (*Working Group* (WG) JCC Sarawak) telah diadakan pada 14 Julai 2022. Mesyuarat Jawatankuasa Kerja tersebut melibatkan pegawai-pegawai dari beberapa agensi Kerajaan Persekutuan dan agensi Kerajaan Negeri Sarawak sebagai persediaan bagi Mesyuarat Jawatankuasa Perundingan Bersama (*Joint Consultative Committee*) Kajian Semula Pemberian Khas Kepada Negeri Sarawak Di Bawah Perkara 112D Perlembagaan Persekutuan (PP). Kementerian Kewangan Malaysia merupakan sekretariat bagi kedua-dua mesyuarat tersebut.

Untuk makluman Ahli Yang Berhormat juga, YB Menteri Kewangan pada 29 Ogos 2022 telah mengadakan kunjungan hormat ke atas Kerajaan Negeri Sarawak yang turut membincangkan mengenai Formula Pemberian Khas di bawah Perkara 112D PP. Kementerian Kewangan

NO. SOALAN : 17

Malaysia akan mengadakan Mesyuarat Jawatankuasa Perundingan Bersama (*Joint Consultative Committee*) Kajian Semula Pemberian Khas Kepada Negeri Sarawak Di Bawah Perkara 112D PP sebaik sahaja mendapat tarikh yang dipersetujui bersama dengan Kerajaan Negeri Sarawak. Selain itu, Mesyuarat Majlis Khas Perjanjian Malaysia 1963 (MKMA63) Kali Ke-5 yang diadakan pada 8 September 2022 telah bersetuju supaya mesyuarat tersebut diadakan dengan kadar segera.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN LOKE SIEW FOOK (SEREMBAN)

TARIKH : 06 OKTOBER 2022 (KHAMIS)

SOALAN

TUAN LOKE SIEW FOOK [SEREMBAN] minta **MENTERI KANAN KERJA RAYA** menyatakan berapa peningkatan kenderaan mengikut jenis kelas yang menggunakan Lebuhraya Utara-Selatan dari tahun 2012 ke tahun 2021 dan perancangan Kerajaan bagi mengatasi kesesakan di lebuhraya tersebut terutama pada waktu puncak dalam tempoh jangka masa pendek dan jangka masa panjang.

JAWAPAN

Tuan Yang Di-Pertua,

Untuk makluman Ahli Yang Berhormat, kadar pertumbuhan trafik mengikut kelas kenderaan bagi Lebuhraya PLUS untuk tempoh 2012 sehingga 2021 adalah seperti di jadual berikut:

TAHUN	PERATUS PERTUMBAHAN/ PENGURANGAN TRAFIK				
	KELAS 1	KELAS 2	KELAS 3	KELAS 4	KELAS 5
2012					
2013	3.2%	3.6%	3.7%	1.6%	2.2%
2014	2.1%	1.0%	1.9%	-2.4%	-5.8%
2015	4.4%	2.6%	0.2%	-3.8%	-3.0%
2016	4.5%	6.0%	3.2%	-6.0%	1.4%
2017	0.4%	3.3%	2.0%	-23.4%	0.6%
2018	-18.7%	-7.1%	-2.5%	-34.9%	-10.6%
2019	2.4%	4.5%	2.0%	-9.5%	-0.6%
2020	-27.7%	-5.5%	-8.5%	-54.1%	-57.6%
2021	-27.1%	-4.9%	-6.6%	-35.5%	-26.1%

Kerajaan sedar akan peningkatan jumlah trafik yang menggunakan lebuhraya utama seperti Lebuhraya Utara Selatan. Pada masa ini kapasiti Lebuhraya Utara Selatan adalah mencukupi untuk menampung aliran trafik pada hari biasa tetapi didapati sesak semasa cuti umum / hujung minggu dan musim perayaan.

Kementerian Kerja Raya (KKR) melalui Lembaga Lebuhraya Malaysia (LLM) dan Syarikat Pengendali lebuhraya telah mengambil beberapa inisiatif untuk meningkatkan kelancaran trafik bagi memastikan keselesaan perjalanan pengguna seperti berikut:

1. Menjadualkan kerja pembaikan dan penyelenggaraan yang melibatkan penutupan lorong di laluan utama lebuhraya di luar waktu puncak kecuali bagi kerja – kerja yang melibatkan kes – kes kecemasan bagi mengelakkan kesesakan lalulintas;

2. Menaiktaraf sistem pengawasan trafik di lebuh raya dengan memasang kamera litar tertutup (CCTV) di lokasi tertentu dan papantanda elektronik (*variable message signboard* – VMS) bertujuan untuk menyalurkan maklumat kepada pengguna lebuh raya mengenai keadaan trafik semasa agar pengguna lebuh raya dapat merancang perjalanan;
3. Menyalurkan maklumat keadaan trafik di lebuh raya menerusi hebahan maklumat keadaan trafik melalui media massa seperti saluran radio dan media sosial seperti *facebook & twitter*;
4. Pengguna juga boleh menghubungi Pusat Pengurusan Trafik, LLM (TMC, LLM) di talian 1 – 800 – 88 – 7752 yang beroperasi dari jam 7.00 pagi hingga 10.00 malam setiap hari bagi mendapatkan maklumat trafik terkini; dan
5. Melaksanakan tindakan penambahbaikan di lokasi yang telah dikenalpasti sebagai kawasan kerap berlakunya kemalangan (*blackspot area*) untuk meningkatkan aspek keselamatan pengguna lebuh raya.

Selain itu, apabila cuti umum / hujung minggu dan musim perayaan pula pihak LLM dan Syarikat Pengendali lebuh raya akan melakukan persediaan seperti berikut untuk menangani peningkatan kenderaan di lebuh raya serta memastikan kelancaran trafik iaitu:

1. Mengeluarkan Nasihat Jadual Perjalanan kepada pengguna lebuh raya bertujuan untuk mengagihkan kemasukan trafik ke lebuh raya pada waktu puncak;
2. Menambah jumlah kakitangan yang bertugas untuk memastikan kejadian luar jangka yang berlaku ditangani dengan segera dan tidak akan menjejaskan aliran trafik;

3. Menyediakan perkhidmatan kren / kembalik dalam keadaan tunggu sedia (*standby*) agar sebarang kejadian luar jangka dapat ditangani dengan segera seterusnya meminimalkan gangguan terhadap pergerakan trafik;
4. Melaksanakan *smartlane* atau aliran kontra di lokasi – lokasi yang tertentu mengikut keperluan tetapi bergantung kepada kesesuaian aliran trafik dan faktor keselamatan; dan
5. Menjalankan kempen – kempen keselamatan untuk mendidik pengguna lebuhraya agar menitikberatkan aspek keselamatan semasa memandu di lebuhraya.

Untuk makluman Ahli Yang Berhormat,

Lebuhraya Pantai Barat (WCE) sepanjang 313 kilometer yang sedang dalam pembinaan akan menghubungkan Banting dan Taiping sebagai alternatif untuk mengurangkan kesesakan di Lebuhraya Utara Selatan (PLUS) terutamanya di laluan antara Ipoh ke Kuala Kangsar. Pada masa ini, sebahagian lebuhraya berkenaan telahpun dibuka secara berfasa kepada trafik dan apabila siap kelak ianya dijangka akan membantu untuk penyuraian trafik yang lebih baik sekaligus berfungsi sebagai pilihan laluan alternatif kepada pengguna lebuhraya menuju ke utara tanah air.

Sebagai perancangan jangka masa panjang untuk mengurangkan kesesakan di Lebuhraya Utara – Selatan (PLUS), Kajian Kemungkinan Lebuhraya Koridor Utara (*Northern Corridor Highway* – NCH) telah dilaksanakan. Kajian berkenaan tersebut adalah bertujuan untuk mengenalpasti jajaran yang paling sesuai. Cadangan Jajaran NCH tersebut adalah bermula dari Changkat Jering (sambungan Lebuhraya Pantai Barat - WCE) hingga ke Padang Besar, Perlis melalui Taiping, Selama, Kuala Ketil, Sungai Petani, Gurun, Pendang, Pokok Sena, Jitra dan berakhir di Padang Besar, Perlis. Cadangan Lebuhraya NCH akan

menyediakan *by pass* dari Juru ke Sungai Dua untuk trafik dari selatan menuju ke Kedah dan Perlis tanpa melalui laluan Juru ke Sungai Dua di Lebuhraya PLUS.

Selain itu, cadangan pembinaan Lebuhraya WISE juga dapat membantu menyuraikan trafik di Lebuhraya Utara Selatan dengan anggaran sebanyak 65% bagi laluan Kuala Kangsar - Terowong Menora - Gopeng. Penyuraian ini dapat mengurangkan kesesakan sekaligus membantu meningkatkan *Level of Service* bagi laluan tersebut terutamanya pada musim perayaan yang biasanya mengakibatkan kawasan Terowong Menora mengalami kesesakan yang teruk.

Disamping itu, sistem kutipan tol menggunakan teknologi RFID juga telah dilaksanakan selaras dengan hasrat Kerajaan untuk mengatasi masalah kesesakan di plaza tol sebelum beralih kepada sistem kutipan tol tanpa henti atau juga dikenali sebagai *Multi Lane Free Flow* (MLFF) menjelang tahun 2025.

Secara keseluruhannya Kerajaan telah menggubal Pelan Pembangunan Rangkaian Jalan Raya (HNDP) bagi memastikan semua infrastruktur yang disediakan dapat menampung trafik pada masa hadapan. Pelan ini menentukan keperluan jalan baru untuk dibangunkan serta keperluan untuk menaik taraf jalan yang sedia ada.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. MUJAHID BIN
YUSOF RAWA [PARIT BUNTAR]**

TARIKH : 6 OKTOBER 2022 | KHAMIS

SOALAN



DATUK SERI DR. MUJAHID BIN YUSOF RAWA [PARIT BUNTAR]
minta **PERDANA MENTERI** menyatakan kedudukan kewangan Tabung
Haji terkini pasca penstrukturan semula yang dimulakan sejak tahun
2018.

JAWAPAN

SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI
(HAL EHWAL AGAMA)

Tuan Yang Di-Pertua,

1. Pada Mei 2018, kerajaan pada waktu itu telah melaksanakan pelan penstrukturan semula **TH** iaitu pemindahan besar-besaran aset **TH** kepada syarikat UJSB termasuklah perancangan penjualan besar-besaran aset perladangan sehingga menjejaskan keyakinan pendeposit kepada institusi umat Islam ini. Implikasinya, pada akhir tahun 2019, jumlah simpanan deposit telah mencatatkan penurunan yang ketara iaitu daripada 75.41 bilion kepada RM 69.42 bilion (jatuh 7.94% dari tahun sebelum), dan aset LTH juga telah menurun sebanyak 2.03%.

	2018 RM' bil (12 bulan)	2019 RM' bil (12 bulan)	%
Aset	76.80	75.24	 2.03%
Simpanan pendeposit	75.41	69.42	 7.94%

2. Namun, setelah pertukaran kerajaan yang berlaku pada awal tahun 2020, kerajaan telah mengkaji semula pelan penstrukturan tersebut termasuklah menghentikan segala bentuk penjualan aset-aset **TH** dan melaksanakan langkah-langkah yang lebih strategik seperti penubuhan semula panel pelaburan yang telah dihapuskan oleh kerajaan sebelum ini bagi menjamin kepercayaan umat Islam dan pendeposit **TH**.

3. Hasilnya, Lembaga Tabung Haji (**TH**) mencatatkan pendapatan berjumlah RM1.47 bilion bagi tempoh separuh pertama 2022 dengan jumlah deposit sebanyak RM88.09 bilion, iaitu paras tertinggi sejak 59 tahun penubuhannya.

NO. SOALAN : 20

4. Sepanjang tempoh enam bulan pertama, lebih daripada 200,000 akaun simpanan baharu telah dibuka, seterusnya menyaksikan peningkatan jumlah keseluruhan pendeposit **TH** kepada 8.6 juta orang. Ini semua menunjukkan kepercayaan dan keyakinan pendeposit terhadap TH telah mula kembali pulih dengan peningkatan simpanan deposit yang sangat ketara.

5. Begitu juga dengan aset dan keuntungan TH yang telah menunjukkan peningkatan yang ketara iaitu RM1.03 bilion dalam tempoh enam bulan pertama sehingga 30 Jun 2022, berbanding RM2.29 bilion untuk keseluruhan tahun 2021.

	2020 RM' bil (12 bulan)	2021 RM' bil (12 bulan)	2022 RM' bil (6 bulan)
Aset	82.54	88.85	89.55
Simpanan pendeposit	75.92	83.34	88.09
Keuntungan selepas zakat	2.21	2.29	1.03

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI ANWAR BIN IBRAHIM
[PORT DICKSON]**

TARIKH : 6 OKTOBER 2022 (KHAMIS)

SOALAN :

Minta **PERDANA MENTERI** menyatakan langkah-langkah perancangan, persediaan dan pelaksanaan bagi menghadapi bencana alam khususnya banjir dalam kerangka kesan perubahan iklim termasuk kedatangan musim tengkujuh tahun ini secara menyeluruh.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Bagi mempertingkatkan kesiapsiagaan untuk menghadapi bencana alam khususnya banjir dalam kerangka perubahan iklim termasuk musim Monsun Timur Laut (MTL) 2022/2023 yang akan datang ini, Kerajaan telah mengambil langkah-langkah berikut:

Pra Bencana

- i. Meningkatkan pemahaman terhadap Arahan Majlis Keselamatan Negara (MKN) No. 20 dan memantapkan persediaan Jawatankuasa Pengurusan Bencana Negeri (JPBN), Jawatankuasa Pengurusan Bencana Daerah (JPBD), Pusat Kawalan Operasi Bencana (PKOB), Pos Kawalan Tempat Kejadian (PKTK) dan agensi-agensi tindak balas melalui program simulasi dan sesi libat urus di seluruh negara;
- ii. Melaksanakan program *Community-Based Disaster Risk Management* (CBDRM) di seluruh negara untuk meningkatkan kesedaran awam terhadap bencana serta peranan mereka sebagai *initial responder*;
- iii. Dari aspek pemantauan dan amaran awal, pihak Jabatan Pengairan dan Saliran (JPS) telah membuat persiapan melalui dua kaedah iaitu struktur dan bukan struktur. Langkah struktur melibatkan projek tebatan banjir serta pembinaan kolam takungan banjir.
- iv. Bagi langkah bukan struktur pula, ianya merangkumi kerja-kerja menaik taraf stesen siren amaran banjir dan stesen kamera web untuk mengumpul dan memproses data hidrologi bagi tujuan ramalan dan amaran banjir. Siren amaran juga

dinaik taraf dari segi bunyi dan akan disekalikan dengan pengumuman sekiranya berlaku banjir di kawasan titik panas (*hotspot*) terutamanya di kawasan penempatan.

- v. Jabatan Pengairan dan Saliran (JPS) juga dalam proses untuk membangunkan Sistem Ramalan dan Amaran Banjir Kilat yang diintegrasikan dengan Program Ramalan dan Amaran Banjir (PRAB);
- vi. Memantapkan peranan Pusat Kawalan Bencana Negara (NDCC) dari aspek perkongsian maklumat berkaitan bencana dengan jalinan kerjasama strategik bersama Jabatan Ukur dan Pemetaan Malaysia (JUPEM) melalui penggunaan *Defence Geospatial Information Management* (DGIM);
- vii. Memantapkan lagi hebahan amaran bencana kepada orang awam. Antara cadangan yang sedang diperhalusi adalah penggunaan aplikasi Whatsapp sebagai medium hebahan. Dua kaedah yang diguna pakai sebelum ini iaitu SMS dan *flash broadcast* akan diteruskan sebagai salah satu medium hebahan amaran bencana kepada orang awam;

Persediaan Tindak Balas Bencana

- viii. Mesyuarat Jawatankuasa Pengurusan Bencana Pusat (JPBP) Bilangan 2 Tahun 2022 telah diadakan pada 12 September 2022 yang dipengerusikan oleh YAB Perdana Menteri.
- ix. JPBP telah mengarahkan supaya JPBD diaktifkan dengan kadar segera bagi menghadapi sebarang kemungkinan berlakunya bencana khususnya banjir.
- x. Bagi memantau persiapan Jawatankuasa Pengurusan Bencana Negeri (JPBN) dan JPBD untuk memastikan ianya berada pada tahap optimum, YBhg. Tan Sri Ketua Setiausaha Negara akan mempengerusikan *Task Force* Persediaan Menghadapi MTL 2022/2023 yang akan bersidang secara berkala sehingga MTL bermula.

- xi. Dalam pada itu, secara keseluruhannya seramai 76,336 pegawai dan anggota agensi tindak balas di semua peringkat berada dalam keadaan siap siaga sepenuhnya dengan pelbagai aset berjumlah 22,622 meliputi aset darat, air, udara, perubatan dan lain-lain.
- xii. NADMA akan menyalurkan peruntukan kepada JPBN dan agensi tindak balas dengan menggunakan tabung Kumpulan Wang Amanah Bantuan Bencana Negara (KWABBN) berjumlah RM16,475,747.00 bagi tujuan pengurusan pengoperasian bencana, membaik pulih dan menaik taraf Pusat Pemindahan Sementara (PPS) dan pembekalan bot fiber berenjin dan jaket keselamatan.
- xiii. Bagi aspek pengurusan mangsa, Jabatan Kebajikan Masyarakat (JKM) telah bersiap sedia untuk mengaktifkan 6,010 Pusat Pemindahan Sementara (PPS) di seluruh negara yang mempunyai kapasiti untuk menempatkan 1,620,855 mangsa. Kementerian Pendidikan Malaysia (KPM) juga telah diarahkan supaya membenarkan penggunaan asrama-asrama sekolah yang tidak dihuni pelajar ketika bencana berlaku untuk dijadikan PPS.
- xiv. Pihak JKM juga telah bersedia memaksimumkan fasiliti penyimpanan bantuan bencana di seluruh negara di lapan buah Depot Simpanan Keperluan Bencana (DSKB), 140 buah stor bencana di negeri dan daerah termasuk 53 buah mini depot (kontena). Bagi memastikan bekalan barang keperluan bencana mencukupi terutamanya di kawasan yang berisiko tinggi terputus hubungan, sebanyak 518 buah pangkalan hadapan juga telah disediakan.
- xv. Untuk mengatasi isu penyediaan makanan kepada mangsa di peringkat awal pembukaan PPS, JKM akan menyediakan makanan *retort* untuk tempoh 24 jam pertama sebagai kaedah penyediaan makanan dengan kadar segera.

- xvi. NADMA dalam proses untuk mengedarkan sebanyak 62,500 unit Kit Makanan untuk diagihkan kepada mangsa di PPS manakala sebanyak 127,272 buah *Collapsible Tent* (C-Tent) telah diagihkan ke seluruh negara. Terkini, NADMA telah menerima sumbangan *C-Tent* sebanyak 103,000 unit daripada Yayasan Sultan Ibrahim untuk kegunaan di PPS seluruh negara;
- xvii. JPBN dan JPBD telah diarahkan untuk memastikan bantuan bekalan sampai di semua lokasi yang terlibat bagi mengelakkan keadaan lebih sukar sekiranya jalan terputus dan sebagainya.

Penyelarasan Pasca Bencana

- xviii. Penambahbaikan mekanisme penyelarasan pasca bencana meliputi bantuan awal, pembersihan, dan bantuan-bantuan pasca bencana kepada mangsa (termasuk bantuan kewangan). Ini termasuk meningkatkan kerjasama antara JPBN dan JPBD bersama NGO berkaitan penyelarasan pengurusan bantuan.
- xix. NADMA telah melaksanakan inisiatif penambahbaikan kerjasama dengan NGO di dalam pengurusan bencana seperti berikut:
 - a. Mewujudkan platform kerjasama Rakan NADMA yang mana terdapat 120 buah NGO berdaftar di bawah inisiatif ini. Pada MTL 2021/2022, direkodkan seramai 26,989 orang sukarelawan daripada NGO-NGO Rakan NADMA terlibat dalam bantuan semasa dan pasca bencana seperti Mercy Malaysia, MRA Malaysia, Yayasan Tzu-Chi dan sebagainya;
 - b. Mengadakan *post-mortem* Rakan NADMA pada 17 Februari 2022 bagi mendengar pandangan dan cadangan penambahbaikan penglibatan NGO di dalam pengurusan bencana. Sesi ini melibatkan seramai 70 orang wakil-wakil

NGO daripada pelbagai kluster termasuk perubatan, komunikasi, logistik, makanan dan pembersihan. Hasil *post-mortem* dianalisis dan dibuat pelaporan komprehensif oleh penyelidik dari Disaster Preparedness & Prevention Centre (DCCP), Malaysia-Japan Institute of Technology, Universiti Teknologi Malaysia;

- c. Mengadakan Bengkel Rejuvenasi Rakan NADMA pada 6-7 Julai 2022 melibatkan wakil-wakil NGO, wakil-wakil Syarikat Berkaitan Kerajaan (GLC), pihak akademik dan wakil-wakil agensi bagi membincang dan memperhalusi program serta aktiviti berdasarkan syor, cadangan dan pandangan yang telah dirumuskan dalam sesi *post-mortem* terdahulu. Antara cadangan yang diberi perhatian khusus adalah penyelarasan inisiatif kerjasama Kerajaan-NGO dalam aspek peningkatan kapasiti, pemerkasaan komuniti dan koordinasi operasi termasuk penglibatan NGI di dalam PKOB; dan
 - d. Program-program latihan bersama dengan NGO/GLC diadakan dari semasa ke semasa sebagai salah satu usaha meningkatkan kerjasama, kesefahaman serta meningkatkan kapasiti bagi menghadapi bencana.
2. Bagi memastikan pengurusan bencana pada masa akan datang dapat berjalan dengan baik dan mengatasi kelemahan-kelemahan yang dikenalpasti sebelum ini, Mesyuarat JPBP yang terdahulu telah bersetuju dengan lapan langkah strategik (jangka masa pendek, sederhana dan panjang) bagi penambahbaikan pengurusan bencana yang dibentangkan oleh NADMA.
3. Lapan langkah strategik ini perlu diterjemahkan oleh setiap kementerian, agensi dan pentadbiran di peringkat daerah, negeri dan persekutuan kepada dasar, pelan tindakan dan pengoperasian mengikut bidang tanggungjawab masing-masing dan ianya akan dipantau pelaksanaannya oleh JPBP melalui NADMA.

4. Kementerian dan Agensi juga disarankan untuk membuat penetapan sebanyak lima peratus daripada perbelanjaan mengurus dan pembangunan bagi tujuan pengurusan bencana pada masa akan datang. Ini penting bagi persiapan perbelanjaan untuk tujuan kesiapsiagaan, tindak balas, pemulihan awal dan pasca bencana serta pencegahan dan mitigasi risiko bencana.
5. Mesyuarat JPBP juga secara dasarnya bersetuju dengan cadangan jangka pendek dan jangka panjang yang dikemukakan oleh Kementerian Alam Sekitar dan Air (KASA) untuk mengatasi punca dan seterusnya menyelesaikan masalah banjir.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KE-14**

PERTANYAAN : LISAN
DARIPADA : Y.B. DATO' SRI AZALINA BINTI OTHMAN
SAID [PENGERANG]
TARIKH : 06 OKTOBER 2022 (KHAMIS)

SOALAN

DATO' SRI AZALINA BINTI OTHMAN SAID [PENERANG] minta
PERDANA MENTERI menyatakan status penggubalan Rang Undang-
Undang Sumbangan Politik dan bila ianya dijangka dibentangkan.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Kajian dasar bagi penggubalan RUU Sumbangan Politik telah dilaksanakan oleh Pusat Governans, Integriti dan Antirasuah Nasional (GIACC) terhadap beberapa buah negara seperti Kanada, Singapura dan Korea Selatan selaras dengan Inisiatif NACP 1.2.3 iaitu “Mengkaji penggubalan rang undang-undang baharu berkaitan sumbangan dana politik”. Susulan daripada kajian tersebut, skop dasar bagi RUU Sumbangan Politik telah dibentangkan oleh YB Menteri di Jabatan Perdana Menteri (Parlimen dan Undang-Undang) di Mesyuarat Jemaah Menteri pada 7 September 2022 lalu, yang mana, mesyuarat telah bersetuju secara prinsip dengan penggubalan RUU Sumbangan Politik.

2. Sehubungan itu, sesi libat urus dengan parti-parti politik telah diadakan pada 28 September 2022 berhubung kerangka dasar bagi RUU Sumbangan Politik sebelum RUU dimuktamadkan.

3. Justeru, pembentangan RUU Sumbangan Politik ini akan dibuat untuk bacaan pertama semasa Mesyuarat Ketiga, Penggal Kelima Parlimen ke-14 bagi Dewan Rakyat pada kali ini.

Sekian, terima Kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WILSON UGAK ANAK
KUMBONG [HULU RAJANG]**

TARIKH : 6 OKTOBER 2022 (KHAMIS)

SOALAN

DATUK WILSON UGAK ANAK KUMBONG [HULU RAJANG] minta **PERDANA MENTERI** menyatakan status terkini pemberian khas peruntukan kewangan untuk Sabah dan Sarawak dalam perjanjian MA63 seperti yang termaktub dalam Perkara 112D.

JAWAPAN

Tuan Yang di-Pertua,

Untuk makluman Ahli Yang Berhormat, Kajian Semula Pemberian Khas kepada Negeri Sabah di bawah Perkara 112D Perlembagaan Persekutuan telah selesai dilaksanakan pada 6 Januari dan 14 Februari 2022. Perintah Perlembagaan Persekutuan (Kajian Semula Pemberian Khas di bawah Perkara 112D) (Negeri Sabah) 2022 telah diwartakan pada 20 April 2022, berkuatkuasa mulai 1 Januari 2022. Bayaran akan dibuat bagi tempoh 5 tahun bermula dari tahun kewangan 2022 hingga 2026. Kerajaan Persekutuan dan Kerajaan Negeri Sabah akan terus berunding mengenai formula baharu yang lebih baik bagi mengimbangi keperluan negeri Sabah dan kedudukan kewangan Kerajaan Persekutuan.

Bagi negeri Sarawak pula, Mesyuarat Jawatankuasa Kerja Kajian Semula Pemberian Khas Kepada Negeri Sarawak Di Bawah Perkara 112D Perlembagaan Persekutuan (*Working Group* (WG) JCC Sarawak)

telah diadakan pada 14 Julai 2022. Mesyuarat Jawatankuasa Kerja tersebut melibatkan pegawai-pegawai dari beberapa agensi Kerajaan Persekutuan dan agensi Kerajaan Negeri Sarawak sebagai persediaan bagi Mesyuarat Jawatankuasa Perundingan Bersama (*Joint Consultative Committee*) Kajian Semula Pemberian Khas Kepada Negeri Sarawak Di Bawah Perkara 112D Perlembagaan Persekutuan (PP). Kementerian Kewangan Malaysia merupakan sekretariat bagi kedua-dua mesyuarat tersebut.

Untuk makluman Ahli Yang Berhormat juga, YB Menteri Kewangan pada 29 Ogos 2022 telah mengadakan kunjungan hormat ke atas Kerajaan Negeri Sarawak yang turut membincangkan mengenai Formula Pemberian Khas di bawah Perkara 112D PP. Kementerian Kewangan Malaysia akan mengadakan Mesyuarat Jawatankuasa Perundingan Bersama (*Joint Consultative Committee*) Kajian Semula Pemberian Khas Kepada Negeri Sarawak Di Bawah Perkara 112D PP sebaik sahaja mendapat tarikh yang dipersetujui bersama dengan Kerajaan Negeri Sarawak. Selain itu, Mesyuarat Majlis Khas Perjanjian Malaysia 1963 (MKMA63) Kali Ke-5 yang diadakan pada 8 September 2022 telah bersetuju supaya mesyuarat tersebut diadakan dengan kadar segera.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 6 OKTOBER 2022 (KHAMIS)

SOALAN

PUAN ISNARAISSAH MUNIRAH MAJILIS [KOTA BELUD] minta **MENTERI LUAR NEGERI** menyatakan adakah Kerajaan akan mengusulkan ketegasan Malaysia berkenaan tuntutan Filipina dan Kesultanan Sulu ke atas Sabah pada Sidang Kemuncak ASEAN yang bakal diadakan pada bulan November tahun ini di Kemboja.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kota Belud atas pertanyaan yang dikemukakan.

Tuan Yang di-Pertua,

2. Sepertimana Yang Berhormat sedia maklum, Kerajaan Malaysia tetap teguh dengan pendirian tidak mengiktiraf dan tidak akan melayan sebarang tuntutan oleh mana-mana pihak ke atas negeri Sabah. Negeri Sabah adalah sebahagian daripada Malaysia dan bukan sebuah wilayah yang boleh dipertikaikan.

3. Untuk makluman, isu tuntutan Filipina dan Kesultanan Sulu ke atas Sabah tidak pernah dibincangkan di mesyuarat rasmi ASEAN memandangkan isu tersebut adalah bersifat dua hala. Kita juga berpendapat buat masa ini tiada keperluan untuk berbuat demikian kerana isu tuntutan pihak yang mendakwa waris Kesultanan Sulu sedang diatasi melalui proses perundangan.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK DR. HASAN BIN BAHROM

TARIKH : 6 OKTOBER 2022 (KHAMIS)

SOALAN

DATUK DR. HASAN BIN BAHROM minta **PERDANA MENTERI** menyatakan secara terperinci jumlah hutang yang ditanggung oleh peneroka FELDA, apakah faktor yang menyumbang kepada pertambahan keberhutangan peneroka, sejauh mana peneroka tahu secara jelas bagaimana hutang itu wujud dan bagaimana ianya dapat diselesaikan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, terdapat 2 kategori hutang utama peneroka FELDA iaitu hutang ladang dan hutang sosioekonomi.
2. Hutang ladang terbahagi kepada 3 jenis hutang iaitu :
 - i. Hutang pembangunan hutang tanam semula;
 - ii. Hutang tunggakan kos operasi ladang; dan
 - iii. Hutang bekalan bahan baja.

3. Manakala hutang sosioekonomi merupakan pinjaman-pinjaman yang disediakan oleh FELDA untuk keperluan peneroka di antaranya adalah:
- i. Pinjaman Pembesaran Rumah;
 - ii. Pinjaman Pemilikan Saham FGV;
 - iii. Pinjaman Skim Insentif Usahawan FELDA (SIUF); dan
 - iv. Pinjaman Pendidikan.
4. Umumnya, nilai mengikut jenis pinjaman yang disediakan oleh FELDA bagi seorang Peneroka adalah seperti berikut:-

Bil.	Jenis Pinjaman	Nilai Pinjaman (RM)
i	Pinjaman Pembangunan Tanam Semula (Caruman Tanam Semula Penuh dan Kos Pembangunan RM18,000/hektar)	110,300
ii	Pinjaman Pembesaran Rumah	40,000
iii	Pinjaman SIUF	10,000
iv	Pinjaman Pemilikan Saham FGV	3,250
v	Pinjaman Pendidikan (mengikut peringkat pendidikan)	10,000 – 30,000

5. Jumlah hutang ladang setiap peneroka adalah berbeza bergantung kepada jumlah caruman dan keluasan ladang yang diusahakan. Ada ketika apabila hasil ladang rendah dan peneroka perlu diberi pendapatan yang minima setiap bulan, kutipan hutang dan potongan kos operasi terpaksa ditangguhkan, kesannya tunggakan hutang akan bertambah dan di dalam keadaan ini FELDA terpaksa menanggung belanja kos operasi bagi kerja yang telah dilaksanakan untuk ladang peneroka.
6. Pelaksanaan penghapusan hutang yang diumumkan oleh kerajaan pada tahun lalu telah meringankan beban hutang peneroka dengan pembayaran balik yang lebih rendah. Penghapusan hutang yang dimaksudkan adalah berdasarkan baki hutang sebelum tahun 2020.

7. FELDA telah melaksanakan inisiatif bagi memastikan hutang peneroka tidak terus meningkat terutamanya berkaitan hutang ladang, iaitu tempoh pengurusan pembangunan tanam semula ladang serta kemudahan pinjaman sara hidup telah disingkatkan dari 8 tahun ke 4 tahun sahaja. Manakala peneroka akan mula mendapat hasil atau pendapatan sebenar ladang bermula tahun ke-5.
8. Secara umumnya, semua peneroka mengetahui mengenai kedudukan hutang masing-masing, iaitu sama ada hutang ladang ataupun hutang sosioekonomi. FELDA menyediakan penyata hutang kepada peneroka yang terlibat secara tahunan. Walaubagaimanapun pengeluaran penyata hutang kebelakangan ini berlaku sedikit kelewatan dan perkara ini sedang ditambah baik.
9. Selain Penyata Hutang, peneroka turut disediakan penyata pendapatan setiap bulan dan penyata ini turut memaparkan jumlah pembayaran bulanan yang boleh dijadikan bukti ataupun rekod pembayaran yang telah dilakukan oleh peneroka.
10. Peneroka turut dimaklumkan berkenaan kemajuan kerja dan perbelanjaan pembangunan ladang melalui mesyuarat Jawatankuasa Pengurusan Ladang Lestari Rancangan yang diadakan hampir setiap bulan. Menerusi mesyuarat ini turut akan memberi gambaran jumlah hutang yang terkumpul secara purata untuk setiap peneroka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA HAJI MOHD
SHAFIE BIN HAJI APDAL
[SEMPORNA]**

TARIKH : 6 OKTOBER 2022 (KHAMIS)

SOALAN:

minta **PERDANA MENTERI** menyatakan adakah menjadi satu kelaziman kakitangan awam persekutuan yang bermasalah akan dihantar ke Sabah dan Sarawak dan nyatakan justifikasi tindakan tersebut.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kenyataan bahawa kakitangan awam Persekutuan yang bermasalah akan dihantar ke Sabah dan Sarawak adalah tidak tepat dan hanyalah berdasarkan persepsi semata-mata. Pada masa ini, pertukaran pegawai awam dilaksanakan atas sebab pusingan kerja dan kenaikan pangkat serta mengambil kira Dasar Perpaduan Negara melalui pengukuhan perpaduan kaum dan integrasi nasional ke arah melahirkan Keluarga Malaysia yang menghargai dan mengamalkan perpaduan.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK ROZMAN BIN ISLI
(LABUAN)**

TARIKH : 6 OKTOBER (KHAMIS)

SOALAN

DATUK ROZMAN BIN ISLI (LABUAN) minta **MENTERI WILAYAH PERSEKUTUAN** menyatakan satu persatu kertas cadangan (jenis kaedah pembinaan/ kos) yang disenarai pendek oleh Kementerian bagi pembinaan Jambatan Labuan-Sabah sepanjang tempoh 2018 hingga 2022.

JAWAPAN

Tuan Yang di-Pertua,

Untuk makluman Ahli Yang Berhormat, sepanjang tempoh 2018 sehingga 2022, pihak Kementerian Wilayah Persekutuan (KWP) dan Perbadanan Labuan (PL) telah menerima pelbagai cadangan daripada syarikat swasta yang berminat untuk melaksanakan projek Jambatan Labuan-Sabah termasuk menjalankan kajian feasibiliti. Antara cadangan yang diterima adalah berbentuk surat *Expression of Interest* bersama profil syarikat tanpa cadangan yang terperinci.

Namun pihak Kementerian tidak menyenarai pendek mana-mana cadangan dan pada September 2020 telah mendapat kelulusan prinsip untuk melaksanakan cadangan pembinaan Jambatan Labuan-Sabah secara Kerjasama Awam-Swasta (*Public Private Partnership*) melalui proses *Request for Proposal* (RfP) bagi membolehkan syarikat untuk mengemukakan cadangan yang berdaya maju. Pihak Kementerian juga telah memaklumkan kepada syarikat yang berminat tentang Iklan RFP pada 23 April 2021.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KE-14**

PERTANYAAN : LISAN
DARIPADA : Y.B. DATUK SERI SAIFUDDIN NASUTION BIN ISMAIL [KULIM-BANDAR BHARU]
TARIKH : 06 OKTOBER 2022 (KHAMIS)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **PERDANA MENTERI** menyatakan perkembangan siasatan oleh Jawatankuasa Khas terhadap Ketua Pengarah Perkhidmatan Awam.

JAWAPAN

**YB DATO' SRI DR. HJ. WAN JUNAIDI BIN TUANKU JAAFAR
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Pada 5 Ogos 2022, Jemaah Menteri telah bersetuju supaya satu jawatankuasa khas ditubuhkan bagi menyiasat insiden yang melibatkan Ketua Pengarah Perkhidmatan Awam dan pegawai-pegawai Jabatan Imigresen Malaysia di Lapangan Terbang Antarabangsa Kuala Lumpur. Pada tarikh yang sama, YBhg. Tan Sri Dato' Seri Ketua Setiausaha Negara telah mengumumkan penubuhan Jawatankuasa Siasatan (JKS) bagi menyiasat insiden tersebut.

2. Satu JKS Bagi Insiden Melibatkan Pegawai Tinggi Kerajaan telah diwujudkan atas arahan YBhg. Tan Sri Dato' Seri. Mohd Zuki bin Ali, Ketua Setiausaha Negara pada 8 Ogos 2022. JKS ini dianggotai oleh empat orang panel iaitu:

- i. YBhg. Tan Sri Idrus Harun, Peguam Negara sebagai Pengerusi;
- ii. YBhg. Tan Sri Acryl Sani Abdullah Sani, Ketua Polis Negara;
- iii. YBhg. Datuk Seri Nik Azman Nik Abdul Majid, Ketua Audit Negara; dan
- iv. YBhg. Tan Sri Azam Baki, Ketua Pesuruhjaya, Suruhanjaya Pencegahan Rasuah Malaysia.

3. YBhg. Tan Sri Dato' Seri Ketua Setiausaha Negara telah bersetuju supaya Jabatan Audit Negara menjadi urus setia bagi JKS. JKS telah mengadakan sesi temu bual dengan saksi-saksi pada 10, 11, 12 dan 18 Ogos 2022. Sesi perbincangan dan memuktamadkan laporan pula telah diadakan pada 19 Ogos 2022.

4. Laporan akhir JKS yang ditanda tangan oleh kesemua empat panel telah dikemukakan pada 22 Ogos 2022 kepada YBhg. Tan Sri Dato' Seri Ketua Setiausaha Negara untuk perhatian dan tindakan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KE-14**

PERTANYAAN : LISAN
DARIPADA : PUAN MARIA CHIN BINTI ABDULLAH
[PETALING JAYA]
TARIKH : 06 OKTOBER 2022 (KHAMIS)

SOALAN

PUAN MARIA CHIN BINTI ABDULLAH [PETALING JAYA] minta **PERDANA MENTERI** menyatakan berapa ramai pengundi Malaysia di luar negara di semua negara dan adakah pihak kedutaan/konsulat akan diarahkan untuk membantu dalam pendaftaran pengundi pos atau pengundi tidak hadir dan menjadi pusat mengundi semasa pilihan raya.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

a. Jumlah pengundi Malaysia di luar negara

1. Untuk makluman Yang Berhormat, Peraturan 2, Peraturan-Peraturan Pilihan Raya (Pendaftaran Pemilih) 2002 menyatakan warganegara yang termasuk di bawah kategori Pengundi Tidak Hadir (PTH) di luar negara ialah seperti berikut:

- i. Penjawat awam Kerajaan Persekutuan, Kerajaan mana-mana negeri, pihak berkuasa tempatan atau pihak berkuasa berkanun yang bertugas di luar negara serta pasangan mereka yang tinggal bersama di luar negara; dan
- ii. Pelajar sepenuh masa di mana-mana universiti atau mana-mana institusi pendidikan tinggi di luar negara serta pasangan mereka yang tinggal bersama di luar negara.

2. Berdasarkan permohonan daripada mana-mana warganegara yang termasuk dalam kedua-dua kategori di atas, SPR akan mendaftarkan mereka di bawah kategori Pengundi Tidak Hadir (PTH) Luar Negara. **Sehingga 30 Ogos 2022 jumlah Pengundi Tidak Hadir (PTH) Luar Negara ialah seramai 3,172 orang.**

3. **SPR tidak mempunyai maklumat jumlah keseluruhan warganegara Malaysia yang berada di luar selain daripada mereka yang mendaftar sebagai PTH Luar Negara.**

b. Bantuan pihak kedutaan/konsulat dalam proses pilihan raya

4. Untuk makluman Ahli Yang Berhormat, hanya pendaftaran sebagai Pengundi Tidak Hadir (PTH) Luar Negara yang boleh dibuat di Kedutaan Besar, Pesuruhjaya Tinggi atau Konsulat Jeneral di negara tempat pemilih bermastautin. Manakala bagi warganegara Malaysia yang bermastautin di luar negara dan merupakan pemilih berdaftar hanya layak memohon undi pos di bawah Kategori 1B (Luar Negara).
5. Permohonan undi pos Kategori 1B (Luar Negara) kini dibuat secara atas talian sepenuhnya di laman web rasmi SPR dan dibuat apabila permohonan undi pos dibuka untuk suatu tempoh masa yang ditentukan oleh SPR. Manakala Pengundi Tidak Hadir (PTH) Luar Negara tidak perlu memohon undi pos kerana mereka secara automatik layak untuk mengundi secara pos.
6. Kedutaan Besar, Pesuruhjaya Tinggi atau Konsulat Jeneral di luar negara tidak menjadi pusat mengundi dalam pelaksanaan pilihan raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN RAMKARPAL SINGH
[BUKIT GELUGOR]**

TARIKH : 6 OKTOBER 2022 (KHAMIS)

SOALAN :

Minta **PERDANA MENTERI** menyatakan secara terperinci untuk memberikan penjelasan terperinci berkenaan langkah-langkah yang telah diambil oleh Kerajaan untuk menangani bencana banjir yang telah diramalkan akan berlaku lebih awal lagi pada hujung tahun ini susulan cuaca yang tidak menentu.

JAWAPAN

**DIJAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sebagai persediaan menghadapi ketidak tentuan keadaan cuaca dan untuk menghadapi musim Monsun Timur Laut (MTL) 2022/2023 yang akan datang ini, Kerajaan telah mengambil langkah-langkah berikut:

Pra Bencana

- i. Meningkatkan pemahaman terhadap Arahan Majlis Keselamatan Negara (MKN) No. 20 dan memantapkan persediaan Jawatankuasa Pengurusan Bencana Negeri (JPBN), Jawatankuasa Pengurusan Bencana Daerah (JPBD), Pusat Kawalan Operasi Bencana (PKOB), Pos Kawalan Tempat Kejadian (PKTK) dan agensi-agensi tindak balas melalui program simulasi dan sesi libat urus di seluruh negara;
- ii. Melaksanakan program *Community-Based Disaster Risk Management* (CBDRM) di seluruh negara untuk meningkatkan kesedaran awam terhadap bencana serta peranan mereka sebagai *initial responder*;
- iii. Dari aspek pemantauan dan amaran awal, pihak Jabatan Pengairan dan Saliran (JPS) telah membuat persiapan melalui dua kaedah iaitu struktur dan bukan struktur. Langkah struktur melibatkan projek tebatan banjir serta pembinaan kolam takungan banjir;
- iv. Manakala bagi langkah bukan struktur pula, ianya merangkumi kerja-kerja menaik taraf stesen siren amaran banjir dan stesen kamera web untuk mengumpul dan memproses data hidrologi bagi tujuan ramalan dan amaran banjir. Siren amaran juga

- dinaik taraf dari segi bunyi dan akan disekalikan dengan pengumuman sekiranya berlaku banjir di kawasan titik panas (*hotspot*) terutamanya di kawasan penempatan;
- v. Memantapkan lagi hebahan amaran bencana kepada orang awam. Antara cadangan yang sedang diperhalusi adalah penggunaan aplikasi Whatsapp sebagai medium hebahan. Dua kaedah yang diguna pakai sebelum ini iaitu SMS dan *flash broadcast* akan diteruskan sebagai salah satu medium hebahan amaran bencana kepada orang awam;

Persediaan Tindak Balas Bencana

- vi. Mesyuarat Jawatankuasa Pengurusan Bencana Pusat (JPBP) Bilangan 2 Tahun 2022 telah diadakan pada 12 September 2022 yang dipengerusikan oleh YAB Perdana Menteri;
- vii. Bagi memantau persiapan JPBN dan JPBD untuk memastikan jentera pengurusan bencana berada pada tahap optimum, YBhg. Tan Sri Ketua Setiausaha Negara akan mempengerusikan *Task Force* Persediaan Menghadapi MTL 2022/2023. Mesyuarat *Task Force* akan diadakan secara berkala sehingga MTL bermula;
- viii. Dalam pada itu, secara keseluruhannya seramai 76,336 pegawai dan anggota agensi tindak balas di semua peringkat berada dalam keadaan siap siaga sepenuhnya dengan pelbagai aset berjumlah 22,622 meliputi aset darat, air, udara, perubatan dan lain-lain;
- ix. Agensi Pengurusan Bencana Negara (NADMA) akan menyalurkan peruntukan kepada JPBN dan agensi tindak balas dengan menggunakan tabung Kumpulan Wang Amanah Bantuan Bencana Negara (KWABBN) berjumlah RM16,475,747.00;
- x. Bagi aspek pengurusan mangsa, Jabatan Kebajikan Masyarakat (JKM) telah bersiap sedia untuk mengaktifkan 6,010 Pusat Pemindahan Sementara (PPS) di seluruh negara

yang mempunyai kapasiti untuk menempatkan 1,620,855 mangsa. Kementerian Pendidikan Malaysia (KPM) juga telah diarahkan supaya membenarkan penggunaan asrama-asrama sekolah yang tidak dihuni pelajar ketika bencana berlaku untuk dijadikan PPS;

- xi. Pihak JKM juga telah bersedia memaksimumkan fasiliti penyimpanan bantuan bencana di seluruh di lapan buah Depot Simpanan Keperluan Bencana (DSKB), 140 buah stor bencana di negeri dan daerah termasuk 53 buah mini depot (kontena). Bagi memastikan bekalan barang keperluan bencana mencukupi terutamanya di kawasan yang berisiko tinggi terputus hubungan, sebanyak 518 buah pangkalan hadapan juga telah disediakan;
- xii. Untuk mengatasi isu penyediaan makanan kepada mangsa di peringkat awal pembukaan PPS, JKM akan menyediakan makanan *retort* untuk tempoh 24 jam pertama sebagai kaedah penyediaan makanan dengan kadar segera memandangkan kesukaran untuk membuat unjuran sebenar makanan bermasak di awal pembukaan PPS berikutan kemasukan mangsa secara berperingkat serta proses pemindahan yang tidak tentu masa;
- xiii. NADMA dalam proses untuk mengedarkan sebanyak 62,500 unit Kit Makanan untuk diagihkan kepada mangsa di PPS manakala sebanyak 127,272 buah *Collapsible Tent* (C-Tent) telah diagihkan ke seluruh negara. Terkini, NADMA telah menerima sumbangan C-Tent sebanyak 103,000 unit daripada Yayasan Sultan Ibrahim untuk kegunaan di PPS seluruh negara; dan

Penyelarasan Pasca Bencana

- xiv. Penambahbaikan mekanisme penyelarasan pasca bencana meliputi bantuan awal, pembersihan, dan bantuan-bantuan pasca bencana kepada mangsa (termasuk bantuan kewangan). Ini termasuk meningkatkan kerjasama antara

JPBN dan JPBD bersama NGO berkaitan penyelarasan pengurusan bantuan.

xv. NADMA telah melaksanakan inisiatif penambahbaikan kerjasama dengan NGO di dalam pengurusan bencana seperti berikut:

- a) Mewujudkan platform kerjasama Rakan NADMA yang mana terdapat 120 buah NGO berdaftar di bawah inisiatif ini. Pada MTL 2021/2022, direkodkan seramai 26,989 orang sukarelawan daripada NGO-NGO Rakan NADMA terlibat dalam bantuan semasa dan pasca bencana seperti Mercy Malaysia, MRA Malaysia, Yayasan Tzu-Chi dan sebagainya;
- b) Mengadakan *post-mortem* Rakan NADMA pada 17 Februari 2022 bagi mendengar pandangan dan cadangan penambahbaikan penglibatan NGO di dalam pengurusan bencana. Sesi ini melibatkan seramai 70 orang wakil-wakil NGO daripada pelbagai kluster termasuk perubatan, komunikasi, logistik, makanan dan pembersihan. Hasil *post-mortem* dianalisis dan dibuat pelaporan komprehensif oleh penyelidik dari Disaster Preparedness & Prevention Centre (DCCP), Malaysia-Japan Institute of Technology, Universiti Teknologi Malaysia;
- c) Mengadakan Bengkel Rejuvenasi Rakan NADMA pada 6-7 Julai 2022 melibatkan wakil-wakil NGO, wakil-wakil Syarikat Berkaitan Kerajaan (GLC), pihak akademik dan wakil-wakil agensi bagi membincang dan memperhalusi program serta aktiviti berdasarkan syor, cadangan dan pandangan yang telah dirumuskan dalam sesi *post-mortem* terdahulu. Antara cadangan yang diberi perhatian khusus adalah penyelarasan inisiatif kerjasama Kerajaan-NGO dalam aspek peningkatan kapasiti, pemerkasaan komuniti dan koordinasi operasi termasuk penglibatan NGI di dalam PKOB; dan

- d) Program-program latihan bersama dengan NGO/GLC diadakan dari semasa ke semasa sebagai salah satu usaha meningkatkan kerjasama, kesefahaman serta meningkatkan kapasiti bagi menghadapi bencana.
2. Bagi memastikan tindakan seberapa segera diambil apabila berlakunya sebarang kejadian bencana, Mesyuarat JPBP Bilangan 2 Tahun 2022 telah mengarahkan supaya JPBD diaktifkan dan peranannya di semua lokasi bencana diperkasakan. Di samping itu, semua JPBN dan JPBD juga diarahkan bersedia lebih awal untuk memastikan bantuan bekalan sampai ke lokasi yang terlibat bagi mengelakkan keadaan lebih sukar sekiranya jalan terputus dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SYED ABU HUSSIN BIN HAFIZ
SYED ABDUL FASAL (BUKIT GANTANG)**

TARIKH : 06 OKTOBER 2022 (KHAMIS)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI KANAN KERJA RAYA** menyatakan kemudahan lampu jalan yang telah disediakan Kementerian bagi peruntukan tahun 2022 dan apakah perancangan naik taraf lampu jalan pada tahun 2023, merujuk kepada jalan Persekutuan seperti FT061 Jalan Batu Hampar – Changkat Jering, FT060 Jalan Batu Hampar – Changkat Jering, FT0074 Jalan Kuala Sepetang – Taiping, FT0001 Jalan Ipoh – Butterworth dan FT3146 Jalan Industri ke Kamunting.

JAWAPAN

Tuan Yang Di-Pertua,

Untuk makluman Ahli Yang Berhormat, telah menjadi tanggungjawab Kementerian ini dalam urus tadbir fasiliti lampu jalan di jalan-jalan Persekutuan di seluruh negara. Antara program yang dilaksanakan melibatkan lampu jalan adalah **Program Senggara Lampu Jalan dan Lampu Isyarat Jalan Persekutuan** dan **Program Menaiktaraf Infrastruktur Keselamatan Jalan Raya** bagi memastikan keselesaan dan keselamatan pengguna jalan raya.

Untuk makluman Ahli Yang Berhormat, jalan yang dinyatakan adalah FT060 (Jalan Changkat Jering – Sri Manjung – Kampung Koh), FT074 (Jalan Taiping – Kuala Sepetang), FT001 (Jalan Ipoh – Butterworth) dan FT3146 (Jalan Masuk ke Kawasan Perindustrian Kamunting, Taiping) terletak di bawah Daerah Larut, Matang dan Selama (LMS).

Melalui **Program Senggara Lampu Jalan dan Lampu Isyarat Jalan Persekutuan**, kerja-kerja penyenggaraan Lampu Jalan dan Lampu Isyarat ini dilaksanakan secara Jabatan iaitu Jabatan Kerja Raya (JKR) melalui pembaikan menggunakan tenaga kerja Jabatan, cabutan undi, lantikan terus, panggilan sebutharga atau tawaran tender. Jumlah keseluruhan peruntukan yang telah disalurkan bagi kerja-kerja penyenggaraan Lampu Jalan dan Lampu Isyarat di Jalan Persekutuan di dalam kawasan Daerah Larut, Matang dan Selama adalah berjumlah RM112 ribu untuk tahun 2020, RM108 ribu untuk tahun 2021 dan sebanyak RM29 ribu untuk tahun 2022.

Bagi perancangan untuk tahun 2023, Kementerian ini telah menyediakan Anggaran Perbelanjaan Jabatan (APJ) sebanyak RM2.54 juta dan sedang dalam semakan pertimbangan namun kelulusan ini adalah tertakluk kepada peruntukan yang diluluskan oleh Kementerian Kewangan.

Untuk makluman Ahli Yang Berhormat, skop pemasangan lampu jalan di kawasan kemalangan atau berisiko kemalangan akibat jalan gelap dilaksanakan melalui **Program Menaiktaraf Infrastruktur Keselamatan Jalan Raya**. Pemasangan lampu jalan di bawah Program ini adalah bersifat setempat (*localized*) (dengan izin) dengan merujuk kepada kriteria seperti persimpangan, selekoh berbahaya, aduan awam dan juga kawasan yang mempunyai jumlah kemalangan yang tinggi dan bukan bagi tujuan pencahayaan di sepanjang laluan.

Sebagai makluman Ahli Yang Berhormat, disebabkan peruntukan bagi tahun 2022 yang terhad, tiada pemasangan lampu jalan baharu di lokasi yang dinyatakan. Namun demikian, beberapa lokasi melibatkan laluan **FT001 dan FT060** dalam negeri Perak telah disenarai pendek dengan oleh Cawangan Kejuruteraan Elektrik Ibu Pejabat JKR Malaysia bagi pelaksanaan kerja di bawah skop pemasangan lampu jalan di kawasan kemalangan atau berisiko kemalangan akibat jalan gelap pada tahun 2023 dan tertakluk kepada kelulusan peruntukan oleh Agensi Pusat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HASANUDDIN BIN MOHD YUNUS
(HULU LANGAT)**

**TARIKH : 6 OKTOBER 2022
(KHAMIS)**

SOALAN

Minta **MENTERI KANAN PERTAHANAN** menyatakan apakah kerosakan kereta kebal PT-91M semasa raptai Hari Kebangsaan lalu adalah isyarat ia sepatutnya ditukar baharu dan adakah Kerajaan ada perancangan untuk menempatkan PT-91M di Sabah serta Sarawak.

JAWAPAN

Tuan Yang di-Pertua,

Kejadian kerosakan yang dialami oleh sebuah kereta kebal Tentera Darat yang pada 26 Ogos 2022 sebaik selesai melaksanakan raptai Perarakan Hari Kebangsaan Ke-65 di hadapan Muzium Negara, Kuala Lumpur adalah disebabkan oleh kegagalan fungsi pada *fuel injection pump* (FIP) kerana *wear and tear* komponen tersebut.

Walau bagaimanapun, kerosakan tersebut tidak menjejaskan fungsi utama kereta kebal ini untuk melaksanakan operasi. Kereta kebal ini juga diselenggara secara berkala melalui kontrak senggaraan dan pembaikan yang masih berkuat kuasa. Pembaikan segera telah dibuat pada hari yang sama dan kereta kebal tersebut telah menyertai semula raptai perarakan pada keesokan harinya.

Sebagai makluman, pihak Tentera Darat telah mengaturlgerak sebanyak 129 aset pertahanan darat bagi menyertai perarakan Hari Kebangsaan pada kali ini, bukanlah sekadar untuk mempamerkan kegagahan anggotanya sahaja, malah turut mempamerkan kehebatan dan kesiapsiagaan aset-aset tempur dari setiap cabang perkhidmatan yang merangkumi elemen tempur, bantuan tempur dan bantuan khidmat. Oleh itu, janganlah hanya memberi fokus terhadap perkara kecil yang sebenarnya telahpun berjaya diselesaikan dalam masa yang singkat sebaliknya fokus utama adalah terhadap tahap keupayaan dan kesiapsiagaan Angkatan Tentera Malaysia (ATM) dalam mempertahankan kedaulatan negara.

Berkait dengan isu kereta kebal ini, ianya telah memasuki inventori Tentera Darat pada tahun 2007 dan merupakan salah satu dari aset strategik Tentera Darat. Tempoh jangka hayat penggunaan (*casting policy*) kenderaan ini adalah selama 20 tahun. Kereta kebal ini akan digunakan sehingga tahun 2027 sebelum diganti dengan kereta kebal jenis yang lain mengikut peredaran teknologi dan keperluan strategik negara pada masa akan datang.

Berdasarkan kepada Pelan Pembangunan Keupayaan Strategik Tentera Darat (Army 4nextG) 2021-2050, pihak Tentera Darat telah merancang untuk menubuhkan sebuah lagi rejimen kereta kebal di Sabah dalam Rancangan Malaysia Ke-13 (RMKe-13). Ini bertujuan untuk mengimbangi keupayaan keseluruhan kuasa tempur Tentera Darat bagi mempertahankan kedua - dua wilayah Malaysia secara serentak.

Kesimpulannya, Tentera Darat sentiasa memastikan keupayaan aset berada pada tahap kesiagaan tertinggi bagi membolehkannya melaksanakan misi dan beroperasi dengan berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI PANGLIMA DR. JEFFREY
GAPARI KITINGAN [KENINGAU]**

TARIKH : 6 OKTOBER 2022 (KHAMIS)

SOALAN

DATUK SERI PANGLIMA DR. JEFFREY GAPARI KITINGAN [KENINGAU] minta **PERDANA MENTERI** menyatakan apakah rancangan Kerajaan untuk mengkaji Akta Pembangunan Petroleum 1974 (PDA74) untuk pemansuannya supaya hakmilik minyak dan gas dikembalikan kepada negeri-negeri pengeluar minyak, iaitu Sabah, Sarawak, Kelantan dan Terengganu atau rancangan memberi saham-saham Petronas kepada negeri-negeri pengeluar minyak tersebut.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sebagaimana Ahli Yang Berhormat sedia maklum, Akta Kemajuan Petroleum 1974 [Akta 144] ialah punca kuasa yang mengamanahkan PETRONAS dengan pemunyaan mengenai petroleum, dan hak, kuasa, kebebasan dan keistimewaan eksklusif untuk mengeksplorasi, mengeksploit, mendapatkan dan memperoleh petroleum sama ada di pantai atau di luar pantai Malaysia dan diperbadankan di bawah Akta Syarikat 1965.
2. Sejak penubuhannya sebagai syarikat minyak dan gas nasional, PETRONAS terus memacu kemajuan operasi dalam dan luar negara sehingga mencapai taraf antara syarikat gergasi minyak yang terkemuka dunia. PETRONAS sehingga kini terus kekal sebagai satu-satunya syarikat dari Malaysia yang tersenarai dalam *Fortune Global 500* dan menduduki kedudukan ke-216 dalam senarai pada tahun 2021.
3. Kerajaan sangat berbangga dengan PETRONAS yang telah diberi mandat oleh Kerajaan Persekutuan untuk melaksanakan amanahnya secara berkesan mengikut perkembangan dan tuntutan semasa. Sebarang cadangan pertukaran mandat dan perubahan akta berkaitan PETRONAS adalah tertakluk kepada bidang kuasa Kerajaan Persekutuan. Kerajaan Persekutuan tidak berhasrat untuk meminda atau mengkaji semula Akta Kemajuan Petroleum 1974 buat masa ini.
4. Keberkesanan dan keupayaan PETRONAS dalam membangunkan sektor minyak dan gas telah banyak menyumbang kepada pembangunan negara. Sehingga tahun 2020, sejumlah RM1.2 trilion telah disumbangkan kepada kerajaan Persekutuan dan sebahagian kerajaan negeri dalam bentuk dividen, bayaran tunai, wang ehsan dan cukai. Berdasarkan rekod PETRONAS dari tahun 1975 sehingga tahun 2021 pula, jumlah bayaran tunai petroleum yang dibayar secara terus oleh

PETRONAS kepada Kerajaan Negeri Sabah adalah sebanyak RM19.2 bilion.

5. Dalam konteks cari gali petroleum, Kerajaan Negeri Sabah dan PETRONAS telah menandatangani Perjanjian Kerjasama Komersial (*Commercial Collaboration Agreement*, atau CCA) pada 7 Disember 2021 untuk meningkatkan lagi kerjasama antara kedua-dua pihak dalam membangunkan industri minyak dan gas di Sabah. Kedua-dua pihak juga bersetuju untuk meningkatkan kerjasama melalui jawatankuasa penyelarasan bersama (*joint coordination committee*) dan dialog strategik tahunan (*annual strategic dialogue*) bagi memajukan lagi industri minyak dan gas di Sabah.

6. Selain itu, Kerajaan Persekutuan bersama Kerajaan Negeri Sabah juga telah menubuhkan Jawatankuasa Bersama bagi menyelaraskan penyerahan kuasa kawal selia bekalan gas kepada Kerajaan Negeri Sabah. Jawatankuasa ini yang terdiri daripada kementerian dan agensi Kerajaan Persekutuan dan Kerajaan Negeri Sabah akan secara bersama menetapkan garis masa penyerahan kuasa kawal selia bekalan gas kepada Kerajaan Negeri Sabah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN MORDI BIMOL
[MAS GADING]**

TARIKH : 6 OKTOBER 2022 (KHAMIS)

SOALAN

Minta **PERDANA MENTERI** menyatakan bagaimana aplikasi Next Generation Critical Communication (NGCC) berfungsi dan apakah status terkini pembangunan aplikasi NGCC berkenaan terutama di kawasan Parlimen Mas Gading.

JAWAPAN

**DI JAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kontrak konsesi '*Government Integrated Radio Network*' (GIRN) telah ditandatangani di antara pihak Kerajaan dengan Sapura Research Sdn Bhd. (SRSB) bagi tempoh 20 tahun bermula pada tarikh 1 Februari 2009 sehingga 31 Januari 2029. Perjanjian konsesi ini ditandatangani bertujuan untuk SRSB menguruskan dan menyediakan operasi dan penyenggaraan bagi rangkaian perkhidmatan komunikasi kritikal bagi kegunaan agensi-agensi keselamatan, kecemasan, ketenteraman awam, penguatkuasaan dan bencana negara. Sehingga kini terdapat sejumlah 17 agensi kerajaan yang menggunakan rangkaian GIRN bagi kegunaan operasi mereka termasuklah kegunaan di Balai Bomba dan Penyelamat, Hospital dan Angkatan Pertahanan Awam di dalam daerah Bau, di kawasan Parlimen Mas Gading.
2. Pada masa ini, kontrak konsesi operasi dan penyenggaraan GIRN telah memasuki fasa ketiga "*Maintenance Services Fee*" (MSF-3) yang mana pihak konsesi telah mula membangunkan aplikasi "*Next Generation Critical Communication*" (NGCC).
3. Untuk makluman YB., sistem GIRN yang telah dibangunkan ini memberikan perkhidmatan komunikasi dengan menggunakan teknologi *Terrestrial Trunk Radio* (TETRA) yang berupaya untuk menghantar dan menerima suara dengan selamat dan cepat. Selari dengan perkembangan teknologi komunikasi jalur lebar terkini, pihak Kerajaan dan pihak SRSB telah bersetuju untuk membangunkan satu aplikasi yang dikenali sebagai aplikasi NGCC. Pembangunan aplikasi ini merupakan penambahbaikan kepada rangkaian GIRN sedia ada bagi membolehkan integrasi rangkaian antara perkhidmatan GIRN

dan perkhidmatan internet serta telekomunikasi 4GLTE (*4th Generation Long Term Evolution*) komersial sedia ada. Ini merupakan penyelesaian alternatif pihak Kerajaan dan pihak Syarikat Konsesi bagi mengatasi masalah kawasan-kawasan yang tidak mempunyai litupan GIRN. Dengan erti kata lain, di mana adanya litupan internet (4GLTE dan Wi-Fi), perkhidmatan perhubungan komunikasi ke rangkaian GIRN boleh dilakukan di seluruh negara termasuk kawasan Parlimen Mas Gading.

4. Fungsi-fungsi yang disediakan dalam aplikasi NGCC ini ialah
 - a. Perkhidmatan Panggilan Suara (*Voice Services*)
 - b. Perkhidmatan Data (*Data Services*)
 - c. Pengawasan dan Pemantauan (*Tracking and Monitoring*)
 - d. Perkhidmatan Mesej Multimedia (*Multimedia Messaging Services*)
 - e. Perkhidmatan Panggilan Video (*Video Call*)
5. Untuk makluman YB., status pembangunan NGCC ini telahpun memasuki fasa akhir pembangunan dan sedang melalui proses pengujian dan pentauliahan sistem yang dibangunkan dan akan mula beroperasi setelah Perjanjian Tambahan ke-4 "*Maintenance Services Fee*" (MSF-3) ditandatangani.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN HAJI MOHAMAD BIN SABU (KOTA RAJA)

TARIKH : 06 OKTOBER 2022 (KHAMIS)

SOALAN

TUAN HAJI MOHAMAD BIN SABU [KOTA RAJA] minta **MENTERI KANAN KERJA RAYA** menyatakan berikutan peningkatan jumlah kenderaan yang mengakibatkan kesesakan teruk di Jalan Bukit Kemuning dan Jalan Kebun, Shah Alam, apakah perkembangan perancangan Kerajaan untuk menaik taraf kedua-dua jalan ini yang telah berulang kali disoal di sini tetapi tiada sebarang tindakan.

JAWAPAN

Tuan Yang Di-Pertua,

Kementerian ini mengambil maklum akan keprihatinan Ahli Yang Berhormat berhubung kesesakan di Jalan Bukit Kemuning (FT190) dan Jalan Kebun (FT190), Shah Alam.

Untuk makluman Ahli Yang Berhormat, Kementerian ini pernah menerima permohonan daripada Negeri Selangor untuk Menaiktaraf Jalan FT190 Dari Persimpangan Taman Sri Muda Melalui Bulatan Batu Lima Ke Persimpangan KESAS, Daerah Klang, Selangor untuk *Rolling Plan 1* (RP1) dan *Rolling Plan 2* (RP 2) Rancangan Malaysia Kedua Belas (RMKe-12).

Berdasarkan kedudukan keutamaan projek dan agihan siling peruntukan pembangunan yang terhad untuk projek baharu, projek tersebut tidak dapat dipertimbangkan untuk diangkat kepada Agensi Pusat untuk kelulusan pada tempoh tersebut.

Manakala bagi *Rolling Plan 3* (RP3) RMKe-12, Kementerian ini tidak menerima permohonan projek ini daripada Kerajaan Negeri Selangor. Kementerian ini akan meneliti semula cadangan projek ini apabila dimohon dalam *Rolling Plan* RMKe-12 yang akan datang dan dipertimbangkan untuk diangkat kepada Agensi Pusat untuk kelulusan, tertakluk kepada kedudukan keutamaan projek dan ketersediaan agihan siling peruntukan pembangunan.

Untuk makluman Ahli Yang Berhormat juga, Jalan Bukit Kemuning (FT190) dan Jalan Kebun (FT190), Shah Alam akan bersambung dengan jajaran Lebuhraya Pesisiran Pantai Barat iaitu Seksyen 3 : *Shah Alam Expressway (KESAS) - North Klang Valley Expressway (NKVE)/ Federal Highway Route 2 (FHR 2)*. Kemajuan semasa bagi jajaran di Seksyen 3, Lebuhraya WCE pada masa ini adalah 76%. Berdasarkan kemajuan

tersebut, jajaran ini dijangka akan disiapkan dan dibuka pada tahun 2024. Ini secara tidak langsung akan dapat menyuraikan trafik di jalan berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KE-14**

PERTANYAAN : LISAN
DARIPADA : Y.B. DATO' HAJI MAHFUZ BIN HAJI
OMAR [POKOK SENA]
TARIKH : 06 OKTOBER 2022 (KHAMIS)

SOALAN

DATO' HAJI MAHFUZ BIN HAJI OMAR [POKOK SENA] minta **PERDANA MENTERI** menyatakan apakah tindakan yang telah diambil terhadap mana-mana pihak berkaitan salah laku membabitkan projek Sistem Penguatkuasaan Automatik (AES) seperti yang dilaporkan oleh Jawatankuasa Kira-kira Wang Negara (PAC).

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pencegahan Rasuah Malaysia (SPRM) telah menjalankan siasatan berhubung projek Sistem Penguatkuasaan Automatik (AES) dan hasil siasatan berkeputusan *No Further Action* (NFA). Walau bagaimanapun SPRM juga melihat kepada isu tadbir urus serta kelemahan kepada sistem dan prosedur dan telah membuka satu Kertas Pemeriksaan dan Perundingan (KPP) bagi menjalankan pemeriksaan terhadap kelemahan sistem dan prosedur yang membabitkan projek Sistem Penguatkuasaan Automatik (AES). Sehubungan itu, satu Surat Nasihat mengandungi dua syor penambahbaikan bagi projek tersebut telah diedarkan kepada Ketua Setiausaha Kementerian Pengangkutan pada 29 Julai 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL
RAHIM
[BALING]**

TARIKH : 6 OKTOBER 2022 (KHAMIS)

SOALAN:

minta **PERDANA MENTERI** menyatakan adakah Kementerian akan memberi peluang kepada guru-guru yang memilih opsyen persaraan pada umur 56 dan 58 tahun untuk meneruskan perkhidmatan hingga umur 60 tahun terutama mereka yang terlibat dengan urusan pentadbiran contohnya Guru Besar atau Pengetua.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Urusan berkaitan persaraan termasuklah pemilihan umur persaraan wajib adalah tertakluk kepada undang-undang pencen yang berkuat kuasa seperti Akta Pencen 1980 dan Peraturan-Peraturan Pencen 1980. Pekeliling Perkhidmatan Bilangan 11 Tahun 2011 telah memberikan peluang kepada pegawai awam untuk membuat opsyen bagi had umur persaraan wajib iaitu dari 55 tahun, 56 tahun dan 58 tahun ke 60 tahun. Opsyen ini adalah merupakan pilihan pegawai itu sendiri dan ia adalah muktamad.
2. Persaraan Guru Besar atau Pengetua tidak akan menjejaskan urusan pentadbiran di sekolah-sekolah. Ini kerana Kementerian Pendidikan Malaysia telah mempunyai program pembangunan kerjaya dan pelan penggantian untuk menempatkan pegawai-pegawai yang sesuai dan layak bagi mengisi kekosongan jawatan tersebut.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 6 OKTOBER 2022 (KHAMIS)

SOALAN

Tuan Steven Choong Shiau Yoon [Tebrau] minta **MENTERI LUAR NEGERI** menyatakan langkah-langkah yang telah diambil oleh Kerajaan Malaysia bersama Kerajaan Kemboja untuk membentaras kejadian penipuan pekerjaan atau 'job scams' yang mengakibatkan warga Malaysia didera secara fizikal oleh sindiket pemerdagangan manusia di Kemboja.

JAWAPAN

Tuan Yang di-Pertua,

2. Untuk makluman Dewan yang mulia ini, Kementerian Luar Negeri (KLN) amat prihatin serta memandang serius berhubung isu sindiket penipuan tawaran pekerjaan di luar negara yang membabitkan Keluarga Malaysia. Sebagaimana Dewan yang mulia ini juga sedia maklum, Mesyuarat Jemaah Menteri pada 21 September 2022 telah mengarahkan supaya satu Jawatankuasa Khas melibatkan agensi-agensi yang berkaitan yang diketuai oleh KLN bagi menangani isu ini secara bersepadu dan menyeluruh. Kementerian sedang mengambil tindakan-tindakan yang sewajarnya berhubung perkara ini.

3. Setakat 22 September 2022, KLN melalui Kedutaan-Kedutaan Besar Malaysia di Bangkok, Phnom Penh, Vientiane dan Yangon telah menerima sejumlah 301 laporan mengenai warganegara Malaysia yang menjadi mangsa sindiket penipuan tawaran pekerjaan di luar negara. Daripada jumlah tersebut, seramai 202 orang telah berjaya diselamatkan, dengan 168 orang telah dihantar pulang. Baki seramai 34 orang yang lain sedang ditahan di depoh tahanan imigresen sementara menunggu proses pengusiran pulang, manakala 99 orang lagi masih sedang dikesan.

4. Negara yang mempunyai bilangan kes paling ramai dilaporkan adalah Kemboja dengan 158 kes. Ini diikuti dengan Myanmar 59 kes, Laos 56 kes dan Thailand 28 kes. Daripada jumlah tersebut, bilangan mangsa yang telah diselamatkan di Kemboja adalah seramai 153 orang, 5 orang di Myanmar, 28 orang di Laos dan 16 orang di Thailand.

5. Antara punca utama warganegara Malaysia tertarik dengan tawaran pekerjaan di luar negara termasuklah dijanjikan gaji yang lumayan dengan kemudahan tempat tinggal serta makan minum yang disediakan, ditawarkan pelbagai faedah termasuk percutian berbayar dan pinjaman wang termasuk bagi tujuan berjudi serta terpengaruh dengan ajakan saudara mara atau rakan-rakan. Selain itu, tidak boleh

dinafikan bahawa ada mangsa yang menerima tawaran pekerjaan sedemikian kerana terdesak untuk menyara ahli keluarga.

6. Semua aduan serta dokumen yang diterima oleh KLN daripada pihak waris akan disalurkan terus kepada Perwakilan-Perwakilan Malaysia yang berkenaan untuk tindakan selanjutnya dengan pihak berkuasa negara tuan rumah. Pada masa yang sama, proses ini adalah tertakluk kepada prosedur dan undang-undang di negara terbabit yang melibatkan urusan seperti siasatan, intipan, usaha menyelamatkan, dokumentasi dan sebagainya yang akan mengambil masa.

Tuan Yang di-Pertua,

7. Perwakilan-Perwakilan Malaysia yang terlibat sedang giat bekerjasama dengan pihak berkuasa negara tuan rumah untuk mengesan dan menyelamatkan semua mangsa yang masih berada dalam kawalan kumpulan sindiket di keempat-empat negara tersebut.

8. Tindakan-tindakan yang diambil oleh Perwakilan Malaysia termasuklah mendapatkan bantuan dan kerjasama daripada pihak kerajaan negara terbabit, mengadakan pertemuan dengan pihak berkuasa yang terlibat untuk mengesan serta menyelamatkan para mangsa serta memberikan bantuan konsular sewajarnya setelah mereka diselamatkan bagi membolehkan mereka pulang ke tanah air.

9. Antara kekangan utama yang dihadapi oleh Perwakilan-Perwakilan kita di luar negara dalam usaha menyelamatkan mangsa termasuklah kesukaran akses ke kawasan yang bergolak atau berisiko tinggi, ketiadaan maklumat lengkap dan tepat serta para mangsa yang dipindahkan oleh pihak sindiket dari semasa ke semasa.

10. Untuk makluman Dewan yang mulia ini, Kementerian melalui pelbagai platform telah menasihati individu atau waris yang menjadi mangsa untuk membuat laporan polis terlebih dahulu bagi membantu siasatan. Bagi mengelakkan diri daripada terjebak dalam sindiket ini, mereka yang menerima tawaran pekerjaan di luar negara adalah digalakkan untuk membuat semakan tawaran tersebut terlebih dahulu

dengan Perwakilan Malaysia yang berkenaan sekiranya merasa ragu-ragu tentang tawaran yang diterima.

11. Mereka juga perlu memastikan visa pekerjaan diperolehi terlebih dahulu sebelum melakukan perjalanan ke luar negara untuk bekerja. Perjalanan keluar masuk ke sesebuah negara perlu menggunakan Pasport Malaysia Antarabangsa dengan melalui pintu-pintu sempadan antarabangsa secara sah. Surat tawaran dan kontrak pekerjaan juga perlu difahami dan dimeterai secara bertulis mengikut undang-undang buruh negara tersebut. Warganegara Malaysia yang bekerja di luar negara dinasihatkan supaya turut cakna dengan undang-undang negara berkenaan.

12. Saya ingin mengingatkan semua pihak supaya jangan mengambil sebarang tindakan secara melulu dan tergesa-gesa termasuk mengeluarkan kenyataan yang tidak tepat, yang boleh membahayakan keselamatan serta menjejaskan operasi menyelamatkan warganegara Malaysia yang berada di tempat-tempat berkenaan. Semua pihak disarankan untuk merujuk kepada KLN atau Perwakilan Malaysia di negara-negara tersebut sebelum mengambil sebarang tindakan.

Tuan Yang di-Pertua,

13. Setakat ini, isu membanteras sindiket penipuan pekerjaan di luar negara belum lagi diperbincangkan di peringkat Menteri Luar negara-negara ASEAN, memandangkan ianya bersifat dua hala. Namun, Kerajaan akan terus pro-aktif dalam mengetengahkan isu ini semasa pertemuan dan perbincangan dua hala dengan negara-negara yang terlibat di sela-sela Mesyuarat ASEAN bagi mencari penyelesaian terbaik dalam isu ini bagi memastikan keselamatan dan kesejahteraan Keluarga Malaysia di luar negara sentiasa terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KE-14**

PERTANYAAN : LISAN
DARIPADA : Y.B. TUAN SYED IBRAHIM BIN SYED NOH
[LEDANG]
TARIKH : 06 OKTOBER 2022 (KHAMIS)

SOALAN

TUAN SYED IBRAHIM BIN SYED NOH [LEDANG] minta **PERDANA MENTERI** menyatakan secara terperinci status dan perkembangan inisiatif Jawatankuasa Dasar di bawah Suruhanjaya Pilihan Raya bagi tujuan reformasi pilihan raya yang pernah ditubuhkan sebelum ini.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Setiap keputusan dasar berhubung Suruhanjaya Pilihan Raya (SPR) akan dibincangkan di dalam Mesyuarat SPR atau Mesyuarat Khas SPR. SPR sedang dalam persediaan untuk melaksanakan Pilihan Raya Umum (PRU) Ke-15 yang akan diadakan pada bila-bila masa dan tidak bercadang untuk mengubah sebarang keputusan dasar yang akan mengganggu proses penjalanan pilihan raya sedia ada.

Walau bagaimanapun, SPR sentiasa komited dengan pembaharuan yang dirancang sebelum ini dan telah memperkenalkan beberapa inisiatif baharu seperti berikut;

- i. Pelaksanaan pendaftaran pemilih secara automatik serta penurunan had umur pemilih daripada 21 tahun kepada 18 tahun termasuk had umur calon Dewan Rakyat dan calon Dewan Undangan Negeri (tertakluk kepada Perlembagaan Negeri);
- ii. Pindaan kepada perundangan subsidairi berkaitan pilihan raya (Peraturan Pendaftaran Pemilih dan Penjalanan Pilihan Raya) selaras dengan pelaksanaan pendaftaran automatik dan Undi18; dan
- iii. Membangunkan beberapa sistem baharu oleh SPR seperti dalam urusan pendaftaran, semakan dan lain-lain. Sebagai contoh mySPR dan permohonan undi pos atas talian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KE-14**

PERTANYAAN : LISAN
DARIPADA : Y.B. TUAN TEH KOK LIM
[TAIPING]
TARIKH : 06 OKTOBER 2022 (KHAMIS)

SOALAN :

TUAN TEH KOK LIM [TAIPING] minta **PERDANA MENTERI** menyatakan impak ketidaktentuan tarikh PRU 15 terhadap pelaburan asing dan dalam negara. Adakah perlunya untuk mengubah suai kaedah agar tarikh PRU seterusnya ditetapkan sebaik sahaja Ahli Parlimen PRU 15 mengangkat sumpah.

JAWAPAN

YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)

Tuan Yang di-Pertua,

Perkara 113 Perlembagaan Persekutuan telah menetapkan 3 tanggungjawab yang hendaklah dilaksanakan oleh Suruhanjaya Pilihan Raya (SPR) dan salah satunya adalah menjalankan pilihan raya bags Dewan Rakyat dan Dewan-Dewan Undangan Negeri.

Berdasarkan kepada Fasal (3) Perkara 55 Perlembagaan Persekutuan, Parlimen hendaklah terus berjalan selama lima (5) tahun dari tarikh mesyuarat pertamanya dan selepas itu adalah terbubar. Manakala Fasal (4) Perkara 55 Perlembagaan Persekutuan menjelaskan apabila Parlimen

dibubarkan, suatu pilihan raya umum hendaklah diadakan dalam tempoh enam puluh (60) hari dari tarikh pembubaran tersebut. Sekiranya tempoh tersebut hendak dipinda atau diubahsuai, maka pindaan kepada Perlembagaan Persekutuan hendaklah dibentang dan diluluskan oleh Parlimen.

Dua keadaan yang boleh menyebabkan Parlimen dibubarkan lebih awal oleh Yang di-Pertuan Agong ("YDPA") ialah jika YDPA atas nasihat Jemaah Menteri di bawah Perkara 40(1) dan 40(1A) PP membubarkan Parlimen menurut Perkara 55(2) PP (sebelum tempoh lima tahun tamat) dan YDPA, menurut budi bicaranya, membubarkan Parlimen lebih awal sekiranya Perdana Menteri yang tidak lagi mendapat kepercayaan majoriti ahli Dewan Rakyat, memohon untuk YDPA membubarkan Parlimen di bawah Perkara 43(4) PP. Namun, dalam hal ini, YDPA boleh tidak memperkenankan permintaan bagi pembubaran Parlimen tersebut sebagaimana yang diperuntukkan di bawah Perkara 40(2)(b) PP (kes Mahkamah Persekutuan **Dato' Seri Ir Hj Mohammad Nizar Jamaluddin V. Dato' Seri Dr. Zambry Abdul Kadir; Attorney General (Intervener)** [2010] 2 MLJ 285).

Sekian, terima kasih.